

卷之五



唐會要卷第八十七

推忠協謀佐理功臣光祿大夫守司空兼門  
下侍郎同中書門下平章事暨修國史上柱  
國太原郡開國公食邑二千戶實封四百戶

臣王溥纂

轉運鹽鐵總叙

漕運

諸水陸運使

轉運鹽鐵總叙

皇朝自武德永徽以後姜行本薛大鼎褚即皆以漕  
運上言然未能通濟其後監察御史王師順運晉絳



之粟于河渭之間增置渭橋倉自師順始也

開元二年河南尹李傑為水運使大興漕事

十八年宣州刺史裴輝卿上言請依舊法理教倉于  
河口立輸場以受米置河陰縣及河陽栢崖集津三  
門倉又鑿崖開山以車運數十里積于太原倉以利  
漕運上從之拜輝卿江淮轉運使仍以鄭州刺史崔  
希逸河南少尹蕭昊為之刺轉運鹽鐵之有副使自  
此始也輝卿立之三年凡運六七百萬石省陸運之  
傭三千萬由制東都倉嘉倉積江淮之米載以大輿  
運而西至于陝二百里率兩斛計傭錢千此輝卿所

省之數也明年輝卿拜侍中而蕭昊代焉

二十五年運米一百萬石二十九年陝郡太守李齊  
物鑿三門山以通運關三門嶺輸巖險之地俾貧索  
引艦昇于安流自齊物始也

天寶三年韋堅代蕭昊以漉水作廣運潭于望春之  
東而藏列焉是年揚釗以殿中侍御史為水陸運使  
以代韋堅先是米至京師或砂礫糠粃雜乎其間開  
元初詔使揚擲而較其虛寔揚擲之名自此始也  
天寶十四年八月詔水陸運宜停一年天寶以後揚  
國忠王鉉皆無重使以權天下故轉運之事自輝卿



以降罕有聞者

肅宗初第五琦始以錢穀得見請于江淮分置租傭使市輕貨以救軍食遂拜監察御史為之使乾元元年加度支郎中尋兼中丞為鹽鐵使于是始立鹽鐵法就山海井灶收權其鹽立監院官吏其舊業戶洎浮人欲以鹽為業者免其雜徭隸鹽鐵使盜煮私鹽罪有差亭戶自租傭以外無得橫賦人不益稅而國用以饒明年琦以戶部侍郎同平章事詔兵部侍郎呂諲代之寶應三年五月元載以中書侍郎代呂諲是時淮河阻兵飛輒路絕鹽鐵租賦皆沂漢而上以

侍御史穆寧為河南道轉運租傭鹽鐵使尋加戶部員外遷鄂州刺史以總東南貢賦是時朝議以寇盜未戢關東漕運宜有倚辦遂以通州刺史劉晏為戶部侍郎京兆尹度支鹽鐵轉運使鹽鐵兼漕運自晏始也二年拜吏部尚書同平章事依前充使晏始以鹽利為漕傭自江淮至渭橋率十萬斛傭七千緡補綱吏督之不發丁男不勞郡縣蓋自古未之有也至今為法晏既至淮以書遺元載曰浮于淮泗達于汴入于河西經砥柱硤石少華楚帆越客直抵建章長樂此安社稷之奇業也晏賓于東朝猶有官謗公終



始故舊不信流言賈誼復召宣室弘羊重興功利敢  
不悉力以答所知驅馬陝郊見三門渠津遺跡河陰  
鞏洛見宇文愷立梁公堰分河入渠及李傑新堤故  
事餘像河廟凜然如生步々探討知昔人用心則潭  
衡桂陽必多積穀可以淪波挂席西詣長安三秦之  
人待此而飽六軍之衆待此而強天子無憂都人胥  
悅四方旅拒者頗以破膽三河流離者于茲請命公  
匡載明主為富人候此今之切務不可失也僕願湔  
洗瑕穢一罄愚誠以副公之心且晏勤于官不辭水  
火然運之利與運之病各有四五焉晏自尹京入為

計相共五年矣京師三輔百姓唯若稅畝傷多若使  
每年得江湖二三十萬石即徭賦頓減歌舞皇澤其  
利一也東都殘毀百無一存若米運流通則饑人皆  
附村落邑屋從此滋多命之日引海陵之倉衣食鞏  
洛是計之得者其利二也諸侯有在邊者諸戎有侵  
敗王畧者或聞三江五湖陳々紅粒雲帆桂檝輸納  
帝鄉可以震耀夷夏其利三也自古帝王之盛皆云  
書同文車同軌日月所照莫不率俾今舟車既通商  
賈來往百貨雜集航海梯山聖神光耀漸及貞觀永  
徽之盛其利四也所可疑者函陝凋殘東周尤甚過



宜陽熊耳至武牢成皋五百里中編戶千餘而已人  
烟蕭條獸遊鬼哭輿必脫輻牛必羸角棧車輓輅亦  
不易求今于無人之境興乏人之運固難就矣其病  
一也汴流渾々不修則澱頃因寇難曾未疏決澤滅  
木岸善崩役夫需于沙津吏旋于滸千里泗上困水  
行舟其病二也東亘底柱浍池二陵之河北運虜五  
六百里戍卒久絕奪攘奸宄窟穴囊橐夾河為蔽豺  
狼狺々舟行所經寇亦能往其病三也東淮陰西臨  
蒲板亘三千里此戍相望中軍皆鼎司元侯賤卒亦  
儀同青紫每云食半菽又云無扶纊輓漕所至舡到

便留即非單車使拆簡書所能制矣其病四也是願  
必其思慮奔走之惟中書詳其利病裁成之晏見一  
水不通願荷鍤先往見一粒不運願負米先趨焦心  
苦形期報明主丹誠未尅漕引多虞屏常中流淹泣  
獻狀自此每歲運米數十萬石自江淮北列置巡院  
搜擇皆吏以主之廣牢益以來商賈凡所制置皆自  
晏始廣德一年正月復以第五琦專判度支鑄錢鹽  
鐵事而晏以檢校戶部尚書為河南及江淮以東轉  
運使及與河南副元帥計會開決汴河水永泰二年  
晏為東道轉運常平鑄錢鹽鐵使琦為關內河東劍



南三川轉運常平錢鑄鹽鐵使大曆五年詔停關內河東三川轉運常平鹽鐵使自此晏與戶部侍郎韓滉分領關內河東山南劍南租傭青苗使至十四年天下財賦皆以晏掌之建中元年詔曰朕以征稅多門郡邑凋耗聽于群議思有變更將致時雍宜古訓其江淮米準旨條轉運入京者及諸軍糧儲宜令戶部郎中崔河圖權領之今年夏稅以前諸道財賦多輸京師者及鹽鐵財貨委江州刺史包佶權領之天下錢穀皆歸倉部委中書門下簡而司郎官準格式條理尋貶晏為忠州刺史晏既罷黜天下錢穀歸尚

書省既而出無所稅之是年三月以韓洄為戶部侍郎判度支令部郎中杜佑權勾當江淮水陸運使行劉晏韓滉舊制先是晏為宰臣楊炎所惡貶忠州刺史尋殺于忠州兵興以來凶荒相屬京師米斛萬錢官厨無兼時之食百姓在畿甸者拔穀綏穗以供禁軍晏既遺元載書陳轉稅米利病歲入米數十萬斛以濟關中代第五琦鹽務法益精密初年入錢六十六萬季年則十倍其初大曆末通天下之財而計其所入總一千二百萬貫而鹽利過半季年耀之亂河南節度使據土不奉法賦稅不上州縣益減晏以羨餘



相補人不加賦所入仍舊議者稱之其商榷財用之  
術者必一時之選故晏沒後二十餘年韓洄元瑒裴  
腆包佶盧正李衡相繼分掌財賦皆晏門下晏部吏  
在千里外奉教如目前四方水旱及軍府織芥莫不  
先知焉其年詔曰天下山澤之利當歸王者宜總隸  
鹽鐵使三年以包佶為庶子汴東水陸運鹽鐵租庸  
使崔縱為右庶子汴西水陸運鹽鐵租庸使四年度  
支侍郎趙贊議常平侍事竹木茶漆盡稅茶之言肇  
于此矣

正元元年元瑒以御史大夫為鹽鐵水陸運使其年  
七月以尚書右僕射韓滉統之滉歿宰相竇參實代  
之

五年十二月度支轉運鹽鐵奏此年自揚子運米皆  
分配緣路觀察使差長綱發遣運路既遠實為勞人  
今請當使諸院自差綱節級般運以救邊食從之  
八年詔東南兩稅財賦自河南江淮嶺南山南東道  
至渭橋以戶部侍郎張滂主之河東劍南山南西道  
以戶部尚書度支使班宏生之今戶部所領三川鹽  
鐵轉運自此始也其後宏滂互有短長宰相趙憬陸  
贄以其事上聞由是遵大曆故事如劉晏韓滉所分



馬

九年張滂奏立稅茶法郡國有茶山及商賈以茶為利者委院司分置諸場立三等時常為價為什一之稅是歲得緡四十一萬茶之有稅自滂始也自後裴延齡專判度支與鹽鐵益殊塗而理矣十年潤州刺史王緯代之理于未方數年而李錡代之監院津堰攻張侵剝不知紀極私路小堰厚斂行人多是錡始時鹽鐵轉運有上都留後以副使潘孟陽主之王文叔權傾朝野亦以鹽鐵副使兼學士為留後故鹽鐵副使之俸至今獨優順宗即位有司重奏鹽法以杜

佑判度支鹽鐵轉運使理于揚州元和二年三月以李選代之先是李錡判使天下權酷漕運由其操割專事貢獻牢其寵渥中朝秉事者悉以利交鹽鐵之利積于私室而國用日耗選既為鹽鐵使大正其事其堰埭先隸浙西觀察使者悉歸之因循權署者盡罷之增置河陰數倉置桂陽監鑄平陽銅山為錢又奏江淮河南峽內充鄆嶺南鹽法鹽院去年收鹽價緡錢七百二十七萬比舊法張其佑二千七百八十八餘萬非實數也今請以其數除為煮鹽之外副支度收其數鹽鐵使煮鹽利繫度支自此始也又以程昇



為揚子留後舊年五月巽卒自院權之興唯劉晏得其術而巽次之然初年之利類晏之季年季年之利則三倍于晏矣舊制每歲運江淮米五十萬斛至河陰留十萬四十萬送渭倉晏歿久不登其數惟巽乘使三年無升斗之闕焉六月以河東節度使李鄘代之五年鄘為淮南節度使以宣州觀察使盧坦代之六年坦奏每年江淮運糴米四十萬石到渭橋近日久闕大半請旋收糴遞年貯備從之坦改戶部侍郎以京兆尹王播代之播遂奏元和五年江淮河南嶺南峽中兗鄆等鹽利錢六百九十八萬貫此量改法

已前舊鹽利時價四倍虛估即此錢當為千七百四十餘萬貫矣請副度支收管從之其年詔曰兩稅法悉委郡國初極便人但緣約法之時不定物估今度鹽鐵泉貨是司各有分廵置于都會爰命帖職周視四方簡而易從庶叶權吏政有所弊事有所宜皆得舉聞副我憂寄以揚子鹽鐵留後為江淮已南兩稅使江陵留後為荆衡漢沔東界彭蠡南及日南兩稅使度支山南西道分廵院官充三川兩稅使峽內煎鹽五監充屬鹽鐵使今宜各屬度支便委山南西道兩稅使兼和糶賣峽內鹽屬度支自此始也



七年王播奏去年鹽利除害割峽內鹽收錢六百八十五萬從實估也又奏商人于戶部度支鹽鉄三司飛錢謂之使換

八年以崔俊為揚子留後淮嶺已來兩稅使崔稅為江陵留後荆南已來兩使十三年播又奏以軍興之時財用是切頃劉晏令使皆自案租庸至于州否減錢穀利病物之虛寔皆得而知今臣守務在城不得自往請令臣副使程昇出巡江淮其州府上俱錢穀一切勘問從之閏五月昇至江淮得錢一百八十五萬貫以進其年以播守禮部尚書以衛尉卿程昇

代之明年昇以本官兼御史大夫平章事

十四年昇卒以刑部侍郎柳公綽代之長慶初王播復代公綽四年王涯以戶部侍郎代播復以鹽鉄使為揚州節度使文宗即位入覲以宰相判使其後王涯復判二使表請使茶山之人移植根今舊有貯積皆使焚棄天下怨之九年以事誅而令狐楚以戶部尚書右僕射主之以是年茶法大壞奏請付州縣而入其租于戶部入稅焉

開成元年李石以中書侍郎判收茶法復正元之制也



三年以戶部尚書同平章事揚嗣復主之多革錢穀  
監院之陳事至中壬申凡一十五年多任元臣以集  
其務崔洪自刑部尚書拜法宗以淮南節度使領之  
既而皆殘公台薛元賞李執方盧私正焉植敬晦五  
人于九年之中相踵理之植亦自是居相位

大中五年二月以戶部侍郎裴休為鹽鐵轉運使明  
年八月以本官平章事依前判使始者溺米歲四十  
萬斛其龍至漕倉者十下三四漕吏校蠹敗溺百端  
官舟之況多者歲至七十餘隻緣河奸犯大紊晏法  
休使寮屬按之委河次縣令董之自江津達渭以四

十萬斛之傭計緡二十八萬悉使歸諸漕吏巡院胥  
吏無得侵牟與之為法凡十事奏之六年五月又立  
稅茶之法凡二十條陳奏上大悅詔曰裴休興利除  
害深見奉公盡可其奏由是三歲漕米至渭濱積一  
百二十萬斛無升合况棄焉

十年裴休出鎮澤潞尋以柳仲郢夏侯孜杜棕迭判  
之至咸通五年南蠻攻安南府連歲用兵饋輓不集  
詔江淮鹽鐵巡院和雇舟般運淮南浙西道米至安  
南乾符中又以崔彥昭王凝判之二年凝以所補吏  
生賦改官復命裴垣判之高駢潤州移鎮淮南



亦就判使務

中和元年黃巢犯闕車駕出狩興元府又以蕭溝韋昭度判之及命侍中王鐸為行營都統率諸道之兵收復京城慮調發不時乃以昭度兼供軍使至光啟中所在征鎮自擅兵賦皆不供歲時但貢奉而已由是江淮轉運路絕國命所能制者唯河西山南劍南嶺西道洎官官田令孜自蜀中扈從召募新軍號左右神策共四十四都并南衙官屬僅萬餘三司轉無調發之所舊日兩池推鹽稅課鹽鐵使特置鹽官以總其事自亂離之後河中節度王重榮兼領權務歲

出課鹽三千車以進至是令孜以軍食闕供乃舉廣明故事請以兩池權務歸之鹽鐵詔下重榮上章論計竟不能奪天復年朱全忠兼鎮河中兩池鹽課始加至五十車自天順年後又以孔緯杜讓能崔昭緯嗣薛王知柔徐彥若韓建崔瑄裴樞柳燦相次判之

漕運

舊制凡陸行之馬程日七十里步及驢五十里車三十里水行之程舟之重者沂河日三十里江四十里餘水四十五里空舟沂河四十里江五十里餘水六十里浩流之舟即輕重同制河口一百五十里江一



百里餘水七十里其如底柱之類不拘此限若遇風水淺不得行者即于隨近官司中牒檢記聽折半印武德八年十二月十八日水部郎中姜行本請依隴州開五節堰引水通運許之

永徽元年薛大鼎為滄州刺史界內有瓦棗河隋末填大鼎奏之引魚塩于海百姓歌之曰新河得通舟楫利直達滄海魚塩至當日徒行今騁駟美哉薛公德滂被

顯慶元年十月苑面西塩褚郎請開底柱三門鑿山架險擬通車陸運于是發卒六千人一月而功畢後

水漲引舟竟不能進

咸亨三年關中錢監察御史王師順奏請般晉絳州倉以贍之上委以漕運河渭之間舟楫相繼置倉于渭南東師順之始也

大曆元年六月九日于東都立德坊南穿新潭安置諸州租舡

神龍二年滄州刺史姜師度于薊州之北漲水為溝以備契丹奚之入寇必約舊渠傍海穿漕號為平虜渠以避海難運糧者至今賴焉

開元二年河南尹李傑奏汴州東有梁公堰破江淮



漕運不通傑奉發汴鄭丁夫以濬之省功速就公私  
深以為利刻石水濱以紀其績九年五月二十五日  
勅水運米揚擲四五月米一斛欠五合三八月  
米一斛欠四合二九月米一斛欠三合正十十一月  
十二月米一斛欠二合並與納

十五年正月十二日令將作大匠范安及檢行鄭州  
河口斗門先是洛陽人劉宗器上言請塞汜水舊汴  
河于下流滎澤界開梁公堰置斗門以通淮汴擢拜  
宗器左衛率府曹曹至是新漕填塞行舟不通貶宗  
器為循州安懷戍主安及遂發河南府懷鄭汴滑衛

三萬人疏決開舊河口旬日畢二十年京師穀價踊  
起上召京兆尹裴耀卿問以救人之術耀卿奏曰昔  
貞觀永徽之際祿重米廣每歲轉不過二萬石便足  
今國用漸廣漕運數倍猶不能支從都至陝河路艱  
險既用陸運無由廣致能開漕運變陸為水則所有  
餘動盈萬計且江南租舡候水始進吳人不便漕輓  
由是所在停留日月既淹遂生竊盜臣望于河口置  
一倉納河東租米便放船歸從河口即分入河洛官  
自雇船載運至三門之東置一倉三門既水險即于  
河岸開山車運十數里至三門之西又置一倉每運



至倉即般下貯納水通即運水細便止自太原倉沂  
河入渭更無留停所省鉅萬前漢都閔中年月稍久  
及隋亦在京師緣河皆有舊倉所以國用常贍上深  
然其言至二十二年八月十四日置河縣及河陰  
倉河西栢崖倉三門東集津倉三門西鹽倉門西開  
三門山十八里以避湍險自江津淮而沂鴻溝悉納  
河陰倉自河陰送納含嘉倉又遞納太原倉北所謂自  
太原倉浮渭以寶開中其有侍中裴耀卿充江淮轉  
運使以鄭州刺史崔希逸河南少尹蕭炅為副三年  
凡運七百萬石省脚三十萬貫或說耀卿進所省脚

錢以表其功答曰此並公事豈宜以小道邀名求寵  
也河陰上倉天寶後廢大曆四年戶部尚書劉晏奏  
置汴口倉

二十六年十一月五日潤州刺史齊澣奏常州北界  
隔吳江至瓜步江為限每船渡統瓜步江沙尾軒會  
六十里多為風濤所損臣請于京口埭下真截渡江  
二千里開伊婁河二十五里即遠揚子縣无風水災  
又減租脚錢歲收利百億又玄伊婁埭皆官收其課  
迄今用之

二十八年九月魏州刺史盧軍開通濟渠自石灰窠



引流至州城西都注魏博夾州製樓百餘間以貯江淮之貨

二十九年十一月陝郡太原守李齊物鑿三門上路通流便于漕運開渠得右黎鐸三于石下背有文曰平陸遂改河北縣為平陸縣至天寶元年正月二十五日渠成放流其年陝郡太守韋堅奏引澁水開廣運潭于望春東自華陰永豐倉以通河渭潭

成至二年三月二十六日勅古之善政貴于足食欲求富國必先利人朕以關輔之間尤資殷贍北來轉輸未免艱辛故置此潭以通漕運萬代之利一朝而

成其潭宜以廣運為名其年京兆尹韓朝宗分渭水入自金光門置潭于西市之西街以貯材木永太二年七月十日鑿運水渠自京兆府直東至薦福寺東街至北國子監正東至于城東街正北至逾景風門門近喜門入丁苑濶八尺深丈餘京兆尹黎幹奏正元二年五月勅運通流國之大計其河水每至春夏之時多被兩岸由來盜開斗門舟舡停滯職此之由宜委汴朱等州觀察使選清強官專知分界勾當其鄭州徐州泗州界各仰刺史準此處分仍令知汴州支遣院官計會勾當十五年二月于頊奏移轉運



汴州院于河陰以汴州累遇兵亂失散錢帛故也

元和三年四月增置河陰倉屋一百五十間

十一年十二月始置淮潁水運揚子等諸院來自淮陰沂流至壽州西四十里入潁口又沂流至潁州沈丘界五百里至于陳州項城又沂流五百里入于激河又三百里輸于郟城得米五十萬石附之以芟一千五百萬束計其功省汴運七萬六千貫寶曆二年正月鹽鐵使王播奏揚州城內舊漕河水淺舟舡滯滯轉輸不及期程今從閭門外古七里港開河南東屈曲取禪智寺橋東通舊官河計長一十九里其功

役所費當使自方圓支遣從之

咸通三年五月南蠻陷交趾徵諸道兵赴嶺南詔湖南水運自湘江入漕渠并江西水運以饋行營諸軍湘漕沂運功役艱難軍屯廣州乏食潤州人陳磻石詣闕上書言江西湖南沂流糧運不濟軍期臣有竒計以饋南軍帝召見曰奏臣弟听思昔曾任雷州刺史家人隨海船至福建往來大船一隻可致千石自福建不一月至廣州得船數十艘便可致三五萬石又引劉裕海路進軍破虜循故事乃以礮石為鹽鐵巡官往揚子縣專督海運于是軍不闕供



八年三月安南都護高駢奏安南至小邑管水路湍險已令功人鑿去巨石漕船無滯詔褒美之

### 轉運使

開元二十一年八月侍中裴耀卿充江南淮南轉運使二十二年九月太府少卿蕭炅充江淮處置轉運使天寶二年四月陝郡太守韋堅如兼勾當緣河及江淮轉運使四年八月楊釗除殿中侍御史充水陸轉運使乾元元年三月第五琦除度支郎中充諸色轉運使二年十二月兵部侍郎呂諲充勾當轉運使元年建子月戶部侍郎元年充江淮轉運使寶應元

年六月二十八日戶部侍郎劉晏充勾當轉運使廣德二年正月戶部侍郎第五琦充諸道轉運使永泰元年正月劉晏充東畿淮南沂江東西湖南山南東道轉運使第五琦充畿關內河東劍南山南西道轉運使大曆四年三月劉晏除吏部尚書兼御史大夫充東都河南江淮山南東道轉運使建中二年十一月度支郎中杜佑兼御史中丞江淮水陸運使三年十二月二十日包佶除庶子充汴東水陸運使崔縱除右庶子充汴西水陸運使正元元年三月元琇加御史大夫充諸道水陸運使其年七月尚書右僕射



韓滉江淮轉運使五年二月中書侍郎竇參充諸道  
轉運使八年三月張滂除侍郎充諸道轉運使十年  
十月潤州刺史王緯兼諸道轉運使五年十二月以  
浙西觀察使李錡充諸道轉運使永正元年以司空  
平章事杜佑再兼諸道轉運使元和元年四月兵部  
侍郎李巽充諸道轉運使三年六月刑部尚書李廌  
充諸道轉運使五年十二月盧坦除刑部侍郎充諸  
道轉運使六年四月刑部侍郎王播充諸道轉運使  
十四年五月刑部侍郎柳公綽充諸道轉運使長慶  
元年二月王播復為刑部尚書充諸道轉運使四年

四月王珪為戶部侍郎充諸道轉運使寶曆元年正  
月王播為淮南節度又充諸道轉運使太和九年十  
二月右僕射令狐楚充諸道轉運使開成元年四月  
戶部尚書平章事李石充諸道轉運使三年十月揚  
嗣復除戶部尚書諸道轉運使五年二月戶部尚書  
崔珙充諸道轉運使會昌四年七月左僕射充平章  
事杜悰充諸道轉運使六年四月以大理卿馬植為  
刑部侍郎充諸道轉運使大中五年刑部侍郎裴休  
充諸道轉運使十一年兵部侍郎柳仲郢充諸道轉  
運十一年二月戶部侍郎夏侯孜充諸道轉運使十



四年尚書左僕射杜悰復充諸道轉運使咸通五年  
十二月戶部侍郎 充諸道轉運使六年十月兵  
部侍郎于琮充諸道轉運使乾符元年二月崔彥昭  
為兵部侍郎充諸道轉運使其年以父兵部尚書王  
凝充諸道轉運使二年二月兵部侍郎裴坦充諸道  
轉運使四年六月以宣歙觀察使高駢為潤州刺史  
充諸道轉運使六年移節淮南領使如故中元和年  
兵部侍郎蕭遘充諸道轉運使其年中書侍郎平章  
事韋昭度充諸道轉運使光啟二年三月刑部尚書  
孔緯充諸道轉運使天順二年門下侍郎杜讓能充  
諸道轉運使景福二年十一月吏部尚書平章事崔  
昭緯充諸道轉運使乾寧三年京兆尹嗣薛王知柔  
為戶部尚書充諸道轉運使其年九月門下侍郎平  
章事徐彥若充諸道轉運使光化三年八月左僕射  
平章事崔涓充諸道轉運使天祐元年右僕射裴樞  
充諸道轉運使其年門下侍郎平章事柳燦充諸道  
轉運使

河南水陸運使

開元二年閏二月陝郡刺史李傑除河南少尹充水  
陸運使至三年九月畢御名為河南尹不帶水陸運



使至天寶三年十一月李齊物除河南尹又帶水陸  
運使正元十年二月河南尹齊抗克河南水陸運使  
至元和六年十月勅河南水陸運使宜停

### 陝州水陸運使

先天二年十月李傑為刺史克水陸運使自此始也  
已後刺史常帶使天寶十年五月崔元鼓除太守不  
帶水陸運使度支使楊國忠奏臣請自勾當遂加國  
忠陝郡水陸運使至十二年正月二十一日勅陝運  
使宜令陝郡太守崔元鼓充使楊國忠充都使勾當  
至正十三年四月陝虢觀察使于頔兼陝州水陸

運使至元和六年十月勅陝州水陸運使宜停

開元十三年五月二十八日勅陝州水陸運使令別

自置印二十五年六月二十三日詔河南陝運兩使

每年常運一百八十萬石米送京近已減八十萬石  
今據太倉米數支計有餘其今年所運一百萬石亦  
宜停

建中二年十二月停江淮水陸運使轉運事委度支  
處置三年八月分置汴東西水陸運使兩稅鹽鐵使  
正元三年正月諸道水陸運使及度支巡院江淮轉  
運使並宜停



唐會要卷第八十七

唐會要卷第八十八

推忠協謀佐理功臣光祿大夫守司空兼門  
下侍郎同中書門下平章事暨修國史上柱  
國太原郡開國公食邑二千戶實封四百戶  
臣王溥纂

鹽鐵

倉及常平倉

雜錄

鹽鐵

開元元年十二月河中尹婁師度以安邑鹽池漸涸  
開拓疏決水通置為鹽屯公私大收其利其年十一  
月五日左拾遺劉彤論鹽鐵上表曰臣聞漢孝武為



政廐馬三十萬後宮數萬人外討戎夷內興宮室殫費之甚寔百當今然而古費多而貨有餘今用少而財不足者何豈非古取山澤而今取貧人哉取山澤則公私厚而人歸于農取貧人則公利薄而人去其業故先王之作法也山海有官虞衡有職輕重有術禁法有時一則專農二則饒國濟人盛事也臣寔為當今宜之夫煮海為鹽採山鑄錢伐木為寶豐餘之輩也寒而無衣飢而無食傭賃自資者窮苦之流也若能收山海厚利奪豐餘之人蠲調歛重徭免窮苦之子所謂損有餘而益不足帝王之道可不謂乎然

臣願陛下詔鹽鐵不等官各收其利貿遷于人則不及數年府有餘儲矣然後下寬代之蠲窮獨之徭可以惠群生可以柔荒服雖戎狄降附堯湯水旱無乏虞也奉天適變惟在陛下行之上令宰臣議其可否咸以鹽鐵之利甚益國用遂令將作大匠姜師度戶部侍郎強循俱揖御史中丞與諸道按察使檢校海內鹽鐵之課至十年八月十日勅諸州所造鹽鐵每年合有官課此令使人勾當除此更無別求在外不細委知如聞稍有侵尅宜令本州刺史上佐一人檢校依令式收稅如有落帳欺沒仍委按察糾覺奏聞



其姜師度除蒲州鹽池以外自餘更不須巡檢  
正元十六年十二月吏部奏澤潞鄭等州多是鹽末  
請一切禁斷從之二十一年二月停鹽鐵使月進舊  
錢總悉入正庫以助經費而主此務者稍以市時珍  
玩時新物充進獻以求恩澤其後益甚歲進錢物謂  
之羨余而經入益少及正元末遂月獻焉謂之進及  
是而罷

元和二年九月給事中穆贇奏請州府鹽鐵巡院應  
決私鹽死囚請州縣同監免有冤濫從之

其年十二月御史中丞李夷簡奏諸州使有兩稅外  
雜權卒及違勅不法事請諸道鹽鐵轉運度支巡院  
察訪狀報臺司以憑聞奏從之

五年正月度支奏鄜州邠州涇原諸將士請同當處  
百姓例食烏白兩池鹽六年閏十二月戶部侍郎判  
度支盧坦奏河中兩池課鹽勅文祇許于京畿鳳翔  
陝虢河中澤潞河南許沔等二十五州界內糶貨比  
來因循兼越興元府及洋州興鳳文成等六州臣移  
牒勘責得山南西道觀察使報其果閬兩鹽本土戶  
人及巴南諸郡市糶又供營軍士馬尚有懸欠若兼  
數州自然闕絕又得興元府諸耆老狀申訴臣今商



量河中鹽請放入六州界糶貨從之

十年七月度支皇甫鑄奏加陝內四監劔南東西兩川山南西道鹽佑以利供軍從之

十三年鹽鐵使程昇奏應諸州府先請置茶鹽店收稅伏準今年正月一日赦文其諸州府困用兵以來或慮有權置職名及擅加科配事非常制一切禁斷者伏以權稅茶鹽本資財賦贍濟軍鎮蓋是從權兵罷自合便停事久實為重歛其諸道先所置店及收諸色錢物等雖非擅加且異常制伏請準赦文勒停從之 十四年三月鄆青兗三州各置權鹽院十五

年閏正月鹽鐵使柳公綽奏當使諸鹽院場官及專知納給并吏人等有罪犯合結罪者比來推問祇罪本犯所由其監臨主守都無科處伏請從今後舉名例律每有官吏犯贓監臨主守同罪及不能覺察者並請準條科處所冀貧吏革心從之其年九月改河北稅鹽使為權鹽使

長慶元年三月勅河朔初平人希德澤且務寬恭使之獲安其河北權鹽法宜權停仍令度支與鎮冀魏博等道節度審量如能約計謙利錢數都收管每年據數付權鹽院亦在穩便自天寶末兵興以來河北



鹽法羈縻而已暨元和中皇甫鏘奏置稅鹽院同江  
淮兩池權利人若犯禁戎鎮亦頻止訢故有是命其  
月鹽鐵使王播奏揚白州沙兩處納權場請依舊為  
院又奏請鹽院糶鹽付商人請每斗加五十通舊三  
百文價請處煎鹽場停置小舖糶鹽每斗加二十文  
通舊一百九十文價又奏應管煎鹽戶鹽及商并諸  
監院停場官吏所由等前後制勅除兩稅外不許差  
役進擾今諸吏有違越者縣令奏聞貶黜刺史罰一  
季俸錢再犯者委听進止並從之二年三月王播為  
淮南節度使兼領鹽鐵轉運播請鹽携鐵印赴鎮上

都院請別給賜從之其年五月勅兵革初寧寔資筦  
權閭閻重困則在蠲除如聞淄青兗鄆三道往年糶  
鹽價錢近收七十萬貫軍資給費優贍有餘自鹽鐵  
使收管已來軍府頓絕其利遂使經行陳者有停糧  
之怨服隴畝者興加稅之嗟雖官受利而郡益空若  
人獲安寧我能節用鹽鐵使先于淄青兗鄆等道管  
內置小舖糶鹽及巡院納權起長慶二年五月一日  
以後一切並停仍委薛平馬總曹華約比年節度使  
自收管兗軍府州縣逐急用度支仍均減管內貧下  
百姓兩稅錢數兼委節度觀察使至年終以來各具



糶所得錢并減放貧下稅數聞奏四年五月勅東都江陵鹽鐵轉運留後並改為知院者從鹽鐵使王涯請也

太和二年七月勅潼關以東度支分巡院宜併入鹽鐵江淮河陰留後院

開成元年閏五月七日鹽鐵使奏應犯鹽人準正元十九年大和四年已前勅條一石已上者止于決脊杖二十徵納罰錢足于大和四年八月二十已後前鹽鐵使奏二石已上者所犯人處死其居停并将船容載受故担鹽等人並準犯鹽條處問分日近決殺

人轉多權課不加舊今謂却依正元舊條其犯鹽一石已上至一石者請大脊杖二十補充當據捉鹽所由待捉得犯鹽人日放如犯三石已上者即是囊橐奸人背違法禁請決訖待瘡損錮身牒送西北邊諸州府効力仍每季多具人數及所配去處申奏扶持軍器與所由扞敵方就擒者即請準舊條同光火賊例處分從之二年十月勅鹽鐵戶部度支三使下監院官皆郎官御史為之使雖更改官不得陵替如顯有曠敗即具事以聞

五年九月勅稅茶法起來年却付鹽鐵使管



榷酤

正元二年十二月度支奏請于京城及畿縣行榷酒之法每斗榷酒錢百五十文其酒戶與免雜差役從之

元和六年京兆府奏榷酒錢除出正酒戶外一切隨兩稅青苗錢據貫均率從 十二年四月十二日戶部奏準勅文如酤戶出榷酒錢處即不得更置官店榷酤其中或恐諸州府先有不酤戶出錢者即須榷酤請委州府長官據錢額約米麴時價收利應額足即止仍限起請到後一月日內處置 十四年五月

湖州刺史李應奏先是官中酤酒代百姓納榷歲月既久為弊滋深伏望許令百姓自酤取舊額仍許入兩稅隨貫均出依舊依例折納輕貨送上都許之大和八年二月九日勅節文京邑之內本無榷酤自正元用兵之後費用稍廣始定戶店等第今其納榷殊非為民今後特宜停廢 會昌六年九月勅揚州等八道州置榷麴并置官店酤酒代百姓納榷酒錢并充資助軍用各有榷許限揚州陳許汴州襄州河東五處榷麴浙西浙道鄂岳三處置官店酤酒如聞禁止私酤過聞嚴酤一人違



犯連累數家閭里之間不免咨怒宜從今已後如有  
人私酤酒及置私麴有但許罪止一身并所由 縱  
犯據罪處分鄉井之內如不知情並不得追擾其所  
犯人人任用重興兼不得沒入家產鹽池使

景雲四年三月蒲州刺史關內鹽池使先天二年九  
月強循除幽州刺史克鹽池使此池即鹽州池也  
開元十五年五月兵部尚書蕭嵩除關內鹽池使自  
是朔方節度常帶鹽池使

### 鹽鐵使

乾元元年度支郎中第五琦克諸道鹽鐵使上元元

年五月戶部侍郎劉晏克鹽鐵使元年建子月戶部  
侍郎元年克鹽鐵使廣德二年戶部侍郎第五琦克  
諸道鹽鐵使永泰元年正月劉晏克東都淮南浙江  
東西湖南山南東道鹽鐵使第五琦克京畿關內河  
東劍南山南西道鹽鐵使大曆四年三月劉晏除吏  
部尚書克東都江南淮東道鹽鐵使五年三月二十  
六日停建中三年十二月二十日包佶克汴東鹽鐵  
使崔縱克汴西鹽鐵使

正元二年十二月尚書左僕射韓滉加諸道鹽鐵使  
五年二月中書侍郎竇參克諸道鹽鐵使八年三月



戶部侍郎張滂充諸道鹽鈔使十年十月潤州刺史  
王緯充諸道鹽鐵使十五年以浙西觀察使李錡充  
諸道鹽鐵使正元元年以司空平章事杜佑兼諸道  
鹽鐵使元和元年四月兵部侍郎李巽充諸道鹽鐵  
使三年六月刑部尚書李鄘充諸道鹽鐵使五年十  
二月盧坦除刑部侍郎充諸道鹽鐵使六年四月刑  
部侍郎王播充諸道鹽鐵使十四年五月刑部侍郎  
柳公綽充諸道鹽鐵使長慶元年二月王播復為刑  
部尚書充諸道鹽鐵使四年四月王涯除戶部侍郎  
充諸道鹽鐵使太和九年十一月右僕射令狐楚充

諸道鹽鐵使開成元年戶部尚書李石充諸道鹽鐵  
使三年十月楊嗣復為戶部尚書充諸道鹽鐵使五  
年二月戶部尚書崔珙充諸道鹽鐵使會昌元年七  
月左僕射平章事杜悰充諸道鹽鐵使六年四月以  
大理卿馬植為刑部侍郎諸道鹽鐵使大中五年刑  
部侍郎裴休充諸道鹽鐵使十一年兵部侍郎柳仲  
郢充諸道鹽鐵使十二年二月戶部侍郎夏侯孜充  
諸道鹽鐵使十四年右僕射杜悰復充諸道鹽鐵使  
咸通五年十一月戶部侍郎劉鄴充諸道鹽鐵使六  
年十月兵部侍郎于悰充諸道鹽鐵使



乾符元年二月崔彥昭為兵部侍郎充諸道鹽鐵使  
其年又以兵部侍郎王凝充諸道鹽鐵使二年二月  
兵部侍郎裴坦充諸道鹽鐵使四年六月宣歙觀察  
使高駢為潤州刺史諸道鹽鐵使六年移節淮南領  
使如故中和元年兵部侍郎蕭遘充諸道鹽鐵使其  
年中書侍郎平章事韋昭度諸道鹽鐵使光啟二年  
三月刑部尚書孔緯充諸道鹽鐵使

大順二年門下侍郎杜讓能充諸道鹽鐵使景福二  
年十一月吏部尚書平章事崔昭緯充諸道鹽使

乾元二年京兆尹嗣薛王知柔為戶部尚書諸道鹽

鐵使其年九月門下侍郎平章事徐彥君充諸道鹽  
鐵使

光化三年八月左僕射平章事崔徹充諸道鹽鐵使  
天祐元年左僕射裴樞充諸道鹽鐵使其年門下侍  
郎平章事柳璨充諸道鹽鐵使安邑解縣西也

置權監使一員推官一員巡官六員安邑院官一員  
解縣院官一員胥吏若干人防池官健及池戶若干  
人先是兩池鹽務隸度支其職事諸道巡院正元十  
六年史牟以金部郎中王池務耻同院遂奏置使  
額至二十一年鹽鐵度支合為一使以杜佑兼領佑



以度支既稱使其所管不宜更有使各遂與東渭橋使同奏罷之至元和三年七月判度支裴均以兩池轉職繫劇復以留後為權鹽使

烏池在鹽州置權稅使一員權官一員巡官兩員胥吏一百三十人防池官健及池戶四百四十八

溫池置權稅使一員推官兩員巡官兩員胥吏三十九人防池官健及池戶百六十五戶大中四年三月因收復河隴勅令度支收管其鹽仍差靈州分巡院官專勾當至六年勅隸威州以新制置未立課額

胡落池在豐州界隸河東供軍使每鹽採年一萬四千餘石振武天德兩軍及營田水運官健自大中四年党項羗叛擾饋運不通供軍使請權市河東自迫池鹽供食其白迫池屬河東節度使不繫度支長長慶元年二月勅烏池每年糶鹽收博權米以一十五萬石為額定大和二年三月度支奏京兆府奉化縣界鹵池側近百姓取水栢柴燒灰煎鹽每石灰得一十二斤一兩亂法甚于鹹土請行禁絕今後犯據者灰計鹽一如兩池鹽法條例科斷從之三年四月勅安邑解縣兩池權課以實錢一百萬貫



為定額至大中元年正月勅但取足段精好不必許  
舊額錢數及大中六年度支收權利一百二十一萬  
五千餘貫安邑池鹽在解縣朝邑小池在同州鹵池  
在京兆府奉化縣並禁斷不權

### 倉及常平倉

武德元年九月四日置社倉其月二十二日詔曰特  
建農圃用督耕耘思俾齊民既度且富鍾庾之量異  
同水火宜置常平監傷農常平之法行之自古宜令  
諸州加時價三錢糴不得抑歛仍交相付領勿許懸  
欠蠶麥時熟穀米必貴即令減價出糶豈等貯熟者

亦宜準此以時出入務在利人其常平所須錢物宜  
令所司支料奏聞

四年五月二十一日詔州縣義倉本備饑年賑給近  
年以來每三年一度以百姓義倉造米遠送京納仍  
勒百姓私出脚錢自今以後更不得以義倉變造  
七年六月二十八日勅關內隴右河南河北五道及  
荆揚襄蔓縣蓋彭蜀資漢劍茂縣等州並置常平倉  
其本上州三千貫中州二千貫下州一千貫每糴具  
本利與止倉帳同申十年九月十五日廢河陽栢崖  
坦縣等倉十六年十月二日勅自今歲普熟穀價至



賤必恐復農加錢收糴以實倉廩繼逢水旱不慮阻  
饑公私之間或亦為便令所在以常平本錢及當處  
物各于時價上量加三錢百姓有糴易者收糴事須  
兩和不得限數配糴訖具所用錢物及所收糴得物  
數具申所司仍令上佐一人專勾當

二十二年八月九日勅應給貨糧令錄奏勅到三口  
以下給米一石六口以下給二石七口以下給三石  
如給粟準米計折

二十八年正月勅諸州水旱比待奏報然後賑給道  
路悠遠往復淹滯宜令給訖奏聞

天寶六年三月二十二日太府少卿張瑄奏準四年  
五月八日并五年五月十六日勅節文至貴時賤價  
出糴賤時加價收糴若百姓未辨錢物者任準

開元二十八年七月九日勅量事賒糴至粟麥熟時  
徵納臣使引司商監官以均天下之貨市肆騰踊則  
減價而出曰嗇豐美則增價而收庶公私俱濟家給  
人足抑止兼并宣通擁滯至五年十二月廢常平監  
官

正觀二年四月三日尚書左丞戴胄上言曰水旱凶  
災前聖之所不免國無九年儲蓄禮經之所明誠今



喪亂之後戶口凋殘每歲納租未實倉廩隨即出給  
纔供常年若有凶災將何賑恤故隋開皇立制天下  
之人節級輸粟多為社倉終文皇一代得無飢饉及  
大業年中國用不足並取社倉之物以充官費故至  
末塗無以支給今請自王公已下爰及衆庶計所墾  
田稼穡頃畝每至秋熟準其見苗以理觀課盡令出  
粟麥稻之鄉亦同此稅所在立為義倉年穀不登百  
姓饑饉當所州縣隨即取給則有無均平常免匱竭  
上曰既為百姓先作儲貯官為舉掌以備凶年非朕  
所須橫生賦歛利人之事深是可嘉宜下有司議立

條制戶部尚書韓仲良奏王公已下墾田畝納二升  
其粟麥稻之屬各依土地貯之州縣以備凶年制可  
之令害苦宜以葛蔓為之

十三年十二月十四日詔于洛相豳徐齊并秦蒲等  
州置常平倉

永徽二年閏九月六日勅義倉據地稅子實是勞頓  
宜令率戶出粟上下戶五石餘各有差六年八月二  
十九日京東西二市置常平倉以大兩道路不通京  
師米貴

顯慶二年十二月三日京常平倉置常平署官員



咸通元年閏九月六日置河陽倉隸司農寺三年六月十七日于洛州栢崖置教倉容二十萬石至開元十年九月十一日廢

開元二年九月二十五日勅天下諸州今年稍熟穀價全賤或慮量且糴舊糴新不同別用其餘糴者至納錢日若粟麥雜種等時價甚賤恐更迴其艱辛請加價便與折納

廣德二年正月二十五日第五琦奏每年置常平倉及庫使自商量置本錢隨當處來物時價賤則加價收糴貴則減價糴賣

建中元年七月勅夫常平者常使穀價如一火豐不為之減大儉不為之加雖遇灾荒人無菜色自今已後忽米價貴時宜量出官米十萬石麥十萬石每日量付市行人不價糴貨三年九月戶部侍郎趙贊上言曰伏以應制置倉儲粟名曰常平軍興已來此事寢廢曰循未舉垂三十年其間或曰凶荒流散餓死相食者不可勝紀古者平準之法使萬室之邑必有萬石之藏春以奉耕夏以奉耘雖有大賈蓄家不得豪奪吾人者蓋謂能行轉重之法也自陛下登極以來許京城兩市置常平官糴益米雖經頻年少而米



價騰貴此乃即日明驗實安推而廣之當軍興之時  
與時承平或異事須元儲布泉以備時須臣令商量  
請于兩都并江陵成都揚汴蘓洪等州府各置常平  
輕重本錢上至百萬貫下至數十萬貫隨其所宜量  
定多少唯貯斛斗足改絲府等候物貴減價出賣物  
賤加價收糴權其輕重以利罷人從之贊于是條奏  
諸道津要都會之所皆置吏聞人貯貨許錢每貫稅  
三十文天下所出竹木茶漆皆十一稅之以充常平  
本時國用稍廣常賦不足所稅亦隨得而盡終不能  
為常平

正元八年十月勅諸軍鎮和糴貯備共五十三萬石  
本價之外更量與優饒其粟麥據數準折其價直委  
度支以停減江淮運脚錢充並支綾絹絕絲勿令折  
估其所糴粟等委本道節度使監軍同勾當別貯非  
承特詔不得給用

十四年六月詔以米價稍貴令度支出官米十萬石  
于兩街賤糴其月以久旱穀貴人流出大倉廩賑給  
京畿諸縣其年七月詔賑給京畿粟麥三萬石其年  
九月以歲飢出太倉粟三十萬出糴其年十二月以  
河南府穀貴人流令以含嘉倉七萬石出糴



十五年二月以久旱歲飢出太倉粟十八萬石于諸縣賤糶

十九年十月大倉奏請依六典置太倉令兩員丞六員監事十員支計官驅使官三人典六人府史六人從之

元和元年正月制歲時有豐歉穀價有重輕將備水旱之虞在權聚歛之術應天下州府每年所稅地子數內宜十分取二分均充常平倉仍各遂穩便收貯以時糶糴務在救之賑貸所宜速須聞奏六年二月制如聞京畿之內舊穀已盡宿麥米登以

宜常平義倉粟二十四萬石貸借百姓諸道州府有之少糧種虜亦委所在官長用常平義倉米借貸淮南浙西宣歙等道元和二年四月賑貸並宜停徵容至豐年然後徵納其年八月司農少卿崔郾奏停太倉丞二員監事二員從之九年四月詔出太倉粟七十萬石開六場糶之并賑貸外縣百姓秋熟徵納便于外縣收貯以防旱十二年四月詔出粟二十五萬石分兩街降估出糶其年九月詔道應澶水州府河南府澤潞河東幽州江陵府等管內及鄭滑滄景易定陳許晉隍蘓襄復台越唐隨鄧等州人戶宜令



本州厚加優恤仍各以當處義倉斛斗據所損多少  
量事賑給訖其數聞奏其人戶中有漂溺致死者仍  
委所在收瘞其屋宇推倒亦委長吏量事勸課修葺  
使得安存

十三年正月戶部侍郎孟簡奏天下州府常平義倉  
等斛斗請準舊例減估出糶但以石數奏申有司更  
不收管縣州得專以利百姓從之

長慶二年十月詔江淮諸州旱損頗多所在米價不  
免踊貴委淮南浙西浙東宣歙江西福建等道觀察  
使各于本道有水旱處取常平義倉斛斗據時估減

半價出糶以惠貧民四年二月勅出太倉陳米三十  
萬石于兩街出糶其年三月制曰義倉之制其來日  
久近歲所在盜用沒入致使小有水旱生人坐委溝  
壑永言其弊職此之由宜令諸州錄事叅軍專主當  
苟為長吏迫制即許驛表上聞考滿之日戶部差官  
交割如無欠負與減一選如欠者少者量加一選欠  
數過多戶部奏聞節級科處  
太和四年八月勅今年秋稼以熟宜于關內七州府  
及鳳翔府和糶一百萬石開成元年八月戶部奏應  
諸州府及所置常平義倉伏請起今後通公私畝田



別納粟一升逐年添置義倉歛之至輕事必通濟歲月稍久自致充盈縱逢水旱之災永絕流亡之慮勅從之其年十一月忠武軍節度使杜悰并平章節度使王源申奏當道常平義倉斛斗除元額外請別置十萬石以備凶年從之

大中六年四月部奏諸道州府收管常平義倉斛斗今後如有災荒水旱外請委所在長吏差清強官勘審如實便任開倉先從貧不濟戶給貸訖具數分析申奏并報戶部不得妄有給與富豪人戶其斛斗仍仰本州錄事參軍至當年秋熟專勾當據數追收如

州府妄有給使其錄事叅軍本判官請重加殿罰長吏具名申奏勅旨宜依其年十一月勅應畿內諸縣百姓軍戶合送納諸倉及諸使兩稅送納斛斗舊例每斗函頭耗物遽除皆有數限訪聞近日諸倉所由分外邀額利索耗物致使京畿諸縣轉更凋弊農桑無利職此之由自今已來祇令依官額餘並禁斷

雜錄

長安元年十一月十三日勅負債出舉不得迴利作本并法外生利仍令州縣嚴加禁斷  
開元十五年七月二十七日勅應天下諸州縣官寄



附部人興易及部內放債等並宜禁斷

十六年二月十六日詔比來公私舉放取利頗深有損貧戶事須釐革自今已後天下務舉祇宜四分收利官本五分收利

二十年九月二十九日勅綾羅絹布雜貨等交易皆合通用如聞市肆必須見錢深非通理自今後與錢貨無用違者準法罪之

元和五年十一月勅應中外官有子弟凶惡不告家長私舉公私錢無尊長同署文契者其舉錢主并保人各決二十仍均攤貨納應諸色買賣相當後勒買

人面付賣人價錢如違牙人重杖二十京兆尹王播所奏也

寶曆元年正月七日勅節文應京城內有私債經十年已上層出利過本兩倍本部主及元保人死亡並無家產者宜令臺府勿為徵理



唐會要卷第八十九

推忠協謀佐理功臣光祿大夫守司空兼門

下侍郎同中書門下平章事暨修國史上柱

國太原郡開國公食邑二千戶實封四百戶

臣王溥纂

疏鑿利人

磴碾

泉貨

疏鑿利人

武德元年長孫操陝除東道行臺金部郎中遂自陝  
東引水城以代井汲百姓賴之 七年四月九日同  
州治中雲得臣開渠自龍門引黃河溉田六千餘頃



正觀十一年揚州大都督府長史李襲譽以江都俗好商賈不事農業譽乃引雷陂水又築向城塘溉田八百餘頃百姓獲其利

大曆四年三月十五日勅涇堰監光廢宜令却置十二年京兆尹黎幹開決鄭白二水支渠及稻田磴碾復秦漢水道以就陸田

建中三年四月宰相楊炎不習邊事請于豐州置屯田發閔鋪人開後揚渠人頗苦之京兆尹嚴郢常從事朔方曉其利害乃其五城舊屯及兵募倉儲等數奏白按舊屯沃饒之比今十不畊一若力可墾闢不

俟凌渠其諸屯水利可種之田甚廣益功力不及因致荒廢今若兩京關鋪人于豐州凌渠營田徒擾兆庶必無其利臣不敢遠引他事請以內園植稻明之其奏地膏腴田稱第一其內園丁皆京兆人于常處營田月一替其易可見再八月給錢八十糧食在外內園使猶募不占奏入府司集時計一丁一歲當錢九十六千米七斛二斗計所饒丁三百每歲合給錢二萬八千八百貲米二千一百六十斛不知歲終收獲幾何臣計所得不補所費况二千餘里發人出屯田一歲方替其糧穀從太原轉餉漕運價值至多



又每歲人須給錢六十三千米七斛二斗私出資費  
數又倍之據其所收必不登本而闕鋪之人不免流  
散是虛擾畿甸而無益軍儲與天寶以前屯田事殊  
臣至愚不敢不熟計惟當省察疏奏不報郢又上奏  
曰伏以五城舊屯其數至廣臣前挾名聞奏訖其五  
城軍士若以今日所運開渠之糧貨諸城官田至冬  
輸之又以所送開渠坊直布帛先給田者至冬令據  
時估輸穀如此即闕鋪免于徵發五城豐厚力農闕  
鋪以之浚渠十倍利也郢奏不省率聞陵陽渠而竟  
棄之

正元四年六月二十六日涇陽縣三白渠限口京兆  
尹鄭權則奏六縣分水之處寔為要害請諸準堰例  
置監及丁夫守當勅二日依八年三月嗣曹王臯為  
荆南節度使觀察先是江陵東北七十里廢田旁漢  
右提壤決凡二處每夏則為浸溢臯使命塞之廣良  
田五千頃畝收一鍾又規江南廢洲為廬舍架江為  
二橋流人自古者二千餘戶自荆至樂鄉凡二百餘  
里旅舍鄉聚凡十數大者皆數百家楚俗佻薄舊不  
鑿井悉飲陂澤乃合錢鑿井人以為便十三年七  
月詔曰昆明池俯迎都城滿魚所產宜令京兆尹韓



臯克使修堰十六年十一月以東渭橋納給使徐班兼白渠漕渠及昇原城國等渠堰使元和八年孟簡為常州刺史開漕右孟瀆<sup>長</sup>四十里得沃壤四十餘頃觀察使舉其課遂就賜金紫焉其年四月以神策軍士脩城南灰渠其年十二月魏博觀察使田弘正奏準詔開衛州黎陽縣右黃河道從鄭滑節度使薛平之請也先是滑州多水災其城西去黃河二里每夏漲溢則浸壞城郭水及羊馬城之半詢諸將吏得古河道于黎州黎陽縣界遺從事裴弘奉以水患苦于弘正請開右河用水分力弘正遂與平皆上聞詔許

之乃于鄭滑兩郡傲從萬人鑿石河南北長十四里東西闊六十步深二丈七尺決舊河以注新河遂无水患詔並褒美焉

十三年湖州刺史于頔復城縣方山之西湖西湖南朝疏鑿溉三四千頃歲久圯廢至是復之抗稻捕魚之利賴以濟

長慶二年溫造為朗州刺史奏聞後鄉渠九十七里溉田二千頃郡人利之名為右史渠至太和五年七月造復為河陽節度使奏後懷州古渠枋口堰役功田萬溉濟源河內溫武田陟縣田五十頃



四年七月詔疏靈州時造追渠置營田六百頃  
大曆二年二月以詔應念劉仁師克修渠堰副使初  
仁師為高陵令上言三百渠可利者遠而涇陽獨有  
之條理上聞其弊遂革關中大賴焉其年三月內出  
水車樣令京北府造水車散給沿鄭白渠百姓以溉  
水田

### 磴碾

開元九年正月京兆少尹李元紘奏疏三輔諸渠王  
公之家言渠立磴以害水功一切毀之百姓大獲其  
利至廣德二年三月戶部侍郎李拙筠奏請刑部侍

郎王翊克京兆少尹崔昭圻京城比白渠土王公寺  
觀碾磴七十餘廣水田之利計歲收粳稻三百萬石  
大曆十三年正月四日三白渠下碾有坊廢合圻摠  
四十四所自今已後如更置奏即宜錄奏其年正月  
壞京畿白渠八十餘所先是黎澣奏以鄭白支渠磴  
碾確隔水利人不得溉灌請皆毀廢從之時昇平公  
主上之愛女有磴兩輪乞留上曰吾為蒼生爾識吾  
意可為衆先遂即日毀之

元和六年正月京城諸僧有以請莊磴免稅者宰臣  
李吉甫曰奏錢米所徵素有定額寬縉徒有餘之力



配貧下無告之此必不可許從之八年十二月勅應  
賜王公郡至并諸色莊宅碾磴等並任典貼貨賣其  
率稅夫役委府縣收管

### 泉貨

武德四年七月十日廢五錢行開元通寶錢徑八分  
重二銖四奏十文重一兩一千文重六斤四兩以輕  
重夫小最為折衷遠近甚便之其錢文給事中歐陽  
詢製詞及書時稱其上京字舍八分及篆隸二體其  
詞先上後下次左後右讀之自右及左迴環其義亦  
通流俗謂之開元通寶錢鄭虔會稱云詢初進螭梳

自文德皇后恰一甲跡故錢上有恰文十八日置錢  
監于洽并幽益等諸州秦王齊王賜三鑪鑄錢裴寂  
賜一鑪敢有盜鑄者身死家口籍沒至五年三月二  
十四日桂州置錢監

顯慶五年九月以天下惡錢多有天下五錢酬一好  
錢贖取至十月以好錢一文博惡兩文至儀鳳四年  
四月以天下惡錢多甚令家都出遠年糙米及粟就  
市糶斗別納惡錢百文其惡錢令少府司表相知即  
令鑄破其重合斤兩者任將行用至先天元年九月  
二十七日京中用錢惡貨物踴貴諫議大夫楊虛受



上疏曰伏見市井用錢不勝濫惡有加鐵錫即非公  
鑄虧損正道或亂平人銅錫亂雜偽錢豈多正刑漸  
失于科條明罰和加于守長帝京三市人雜五方淫  
巧競馳侈偽成俗至于商賈積滯富豪錙兼并之人  
歲增儲蓄貧素之士日有空虛公錢未益于時須禁  
法求當于代惡要其惡錢臣望官為博取納鑄錢州  
京城並以好錢為用書奏付中書門下議詳以為擾  
改不行至開元六年正月十八日勅禁斷惡錢行三  
銖四分已上舊錢更收人間惡錢鎔破復鑄準樣式  
錢勅禁出之後百姓喧然物價掘動商人不甘交易

宰相宋璟蘓頲奏請出太府錢萬貫分于南北兩京  
平價買百姓間所賣之物堪貯庫宮須者庶得好錢  
散行人間從之又降勅近惡斷錢恐人少錢行用其  
兩京文武官夏季防閣庶使宜即先給錢待後季任  
取所配物貨賣準數還官

七年二月詔天下惡錢並令近斷錢令初下或恐艱  
辛宜量出米十萬石令府縣太府寺選交易穩便處  
所分置依時價糶與百姓收取惡錢便送少府監槌  
碎

乾封元年五月二十五日盜鑄轉多遂改鑄新文曰



乾封泉寶徑寸重二銖六分其開元通寶必舊錢並  
行用其新錢一文當舊錢之十周年之後舊錢並廢  
其後寤錢文之誤米帛增價乃議却用舊錢至二年  
正月二十九日詔比以偽濫斯起所以採封之號改  
鑄新錢靜而思之將為未可高祖撥亂反正爰創規  
模太宗立極承天無所作今廢舊造新恐爭先古其  
開元泉貨宜依舊施行為方法乾封新鑄錢令所司  
貯納吏不須鑄仍令天下置鑪之處並鑄開元通寶  
錢至乾元元年七月十六日詔錢貨之興其久矣蓋  
代有沿革時為重輕周興九府寶啟流泉之利漢造

五銖亦弘改鑄之法必令小大無適母子相權事有  
益于公私理宜循于通變御史中丞第五琦奏請改  
錢以一當十別為新鑄不廢舊錢莫寔三官之資用  
收十倍之利所為于人不得擾從古有經宜聽于請監  
別一當十錢其文曰乾元重寶而重真矯以別之一  
當五十以二十斤成貫仍令鑄錢使即句當起鑄至  
三年三月十三日詔頃屬權臣變法非良遂使貨物  
必相穀帛騰踊求之輿議弊寔由斯今欲仍從舊貫  
漸罷新錢又慮權行轉寔艱急如或猶循所務永塞  
其源實恐物價虛騰黎人失業靜言體要用籍良圖



宜令文武百官九品以上並于尚書省集議委中書門下詳議聞奏至上元元年六月七日詔其重校五十價錢宜減作三十文用其開元舊錢宜一錢十文行用乾元十當錢宜依前行用仍令京中及畿縣依此處分諸州待候進止至七月二十五日勅先造校五十價錢先令畿外減三十價行其天下諸州並宜準此至十二月二十九日詔應典貼莊宅店舖田地碾磴等先為貫錢與貼者令還以寔錢價元少虛錢與貼者令少虛錢贖其餘交閣並依前用十當錢由是錢有虛寔之稱至寶元年五月十九日赦文集開

元乾元重校錢並宜準一文用不須計以虛數

開元二十二年三月二十一日不可以尺寸為交易菽粟不可以抄忽貨有無古之右為以通貨幣豈無變通往者漢文之時已有放鑄之令雖見非于賈誼亦無費于賢君古往今來將亦宜事異亦于不禁私鑄其理如何公卿百寮詳議可否秘書監崔沔議曰大國之有錢時所過用若訢私錢人心競為各狗所求小如有利漸忘本業大計新貧是以賈生之陳七福規于更漢令太公之創九府將以貧人况依法則不成違法則有利謹按漢書文帝雖除盜鑄錢令而



不得雜以鉛錢為他巧者然則雖許私鑄不容奸則鑄者無私則私鑄自息斯則除之與不除為法正等能謹與而法節其用而詐令行而詐不起事變而奸不生斯所以稱賢君子也今若听其私鑄嚴斷惡錢官必得人人皆知禁誠則漢政可作猶恐若皇唐之舊也今若稅銅折役則官治可成計估度庸之則私錢無利易而久簡而難誣謹守舊章无越制度且夫錢之為物貴以通貨利不在多何待私鑄然後足用也左監門銀事叅軍劉秩議曰古者以珠玉為上幣黃金為中幣刀布為下幣管子曰夫三幣握之則非

有補于煖也捨之則非有損于餘也先王以守財物以御人事而平天下也是以命之曰衡者使物一高一下不得有常故與之在君奪之在君以人戴君如日月親君如父母此術也是為人生之權今之錢即古之下幣也陛下若捨之任人則上無以佛下下無以事上其不可一也夫物賤則傷農錢輕則傷賈故善為國者觀物之貴賤錢之輕重夫物重則錢輕錢輕由乎物多多則作法收之少少則重則作法布之使輕重之本必由乎是奈何而假與于人其不可二也夫鑄不雜以鉛鐵則無利雜以鉛鐵則惡



而重禁不足以懲惡方令塞其私鑄之路人猶冒死以犯之况啟其源而欲人從令乎是設陷穽而誘之入其不可三也夫許人鑄錢无利則人不鑄有例之人去南畝者衆去南畝者衆則草萊不墾草萊不墾又鄰于寒餒其不可四也夫人之富溢則不可以賞勸貧餒則不可以威禁故法令不行人之不理皆由貧富之不齊也若許其鑄錢則貧者必不能為臣恐貧者而貧而服役于富室乘之則益盜苦漢文時吳濞諸侯也富埒天子鄧通大夫也財侔王者此皆鑄錢所制也必欲計其私鑄是與人利權而捨其柄其

不可五也陛下必以錢重而傷本工費而利寡則臣願言其失以效愚計夫錢者猶人日資于錢而益不加如舊又公錢重與銅之價頗等故盜鑄者破重為輕錢禁寬則行禁嚴則止則棄矣此錢之所以少也夫鑄錢不用贍者在乎銅貴之由于採用者象矣夫銅以為兵則不如鐵以為器則不如潦禁之物無害陛下何不禁于人銅無所用銅無所用則銅益賤銅賤之用給矣夫銅不布下則盜鑄者兼困而錯兼困鑄則公錢不破則人不犯死刑錢又日增未復利矣是一舉而四善兼之伏惟陛下親察之其年十月



六日勅貨物兼通將以剝用而布帛為本錢力是末  
賤本貴末為弊則深教之間宜為變革自今已後所  
有莊宅口馬交易並先用絹布綾羅絲緯等其餘市  
價至一千以上亦令錢物無用違者科罪二十六年  
于室澗等州置錢監

乾元元年七月戶部侍郎第五琦以國用未足幣重  
貨輕乃先鑄乾元重寶錢以一當十用行之及作相  
請更鑄重輪乾元錢以一當五十與乾元錢開元寶  
錢三品並行既而物價騰貴餓近死亡枕籍道路又  
盜鑄爭起中外皆以為琦變法之弊封聞奏曰遂貶

### 忠長史

四年六月判度支侍郎趙贊以常賦不足用乃請採  
鄆州白銅鑄大錢以一當十權其輕重

建元元年九月戶部侍郎洎上言江淮錢監歲出錢  
四萬五十貫輸于京師度工用轉送之費每貫計錢  
二千是本部倍利也今高州紅崖冶出銅益多又有  
洛源監久廢不理請增上鑿山以取銅與洛源故監  
鑄錢之歲計出錢七萬二十貫度用轉送之資計錢  
九百則利浮本以其江淮七監請皆停罷從之二月  
八日諸道監鐵使包佶奏江淮百姓近日市肆交易



錢交下粗惡博擇納官者三分纔有二分饒並鉛錫銅盪不數斤而致使絹價騰貴惡錢並漸多訪聞諸州山野地窖皆有私錢轉相貨易奸溢漸深今委本道觀察使明立賞罰切加禁斷

正元九年正月張滂奏諸州府公私諸司邑鑄造銅器雜物等伏以國家錢少損失多門興販之徒潛將鋪錢一千為銅六斤造寫雜物器物則斤直六百餘有利饒後銷鑄遂多江淮之間錢寔減耗伏請準從前勅文除鑄鏡分一切禁斷

十年六月勅令後天下鑄造買賣銅器並不須禁止

其器物約每斤價直不得過一百六十文委所在長吏及巡院同勾當訪察如有銷鑄為銅以盜鑄錢論罪十四年十二月鹽鐵使李初奏請諸道州府

多以近日泉貨數少繒帛價輕禁止見錢不令出界致使課利有缺商賈不通諸指揮見錢甚真徃來勿使禁止從之

元和元年二月禁物三年二月詔下錢貴物賤傷農害工權其重輕須有通變比者鉛無禁鼓鑄有妨其江淮諸州府收市銅鉛等先已令諸道知院官勾當緣令初出未各頒下宜委諸道觀察使等與知院



官嚴切勾當事畢日仍委鹽鐵使據所得類會聞奏  
其年四月禁鉛錫錢三年五月鹽鐵使李選上言得  
湖南院中郴州平陽高亭兩縣界有平陽治及馬跡  
曲末等古銅坑納二百八十餘井差官檢覆寔有銅  
錫今請郴州舊桂陽監置爐兩採銅鑄錢每日約二  
十貫計一年鑄成七千貫有益于人從之其年六月  
詔曰募貨之法義在通流若錢有所壅貨當益賤故  
藏錢者得乘人之急居貨者必損已之資今欲着錢  
令以出滯藏加鼓鑄以資流布使高賈旅知禁農桑  
獲安義切救時情非欲利若草之无漸恐人或相驚

應天下高賈先畜見錢者委所在長吏令收市貨物  
官中不得輒有程限逼迫商人任其貨易以永便利  
計周歲之後此法徧行朕當別立新規設蓄錢之禁  
所以先有告示許其方圓意在他時行法不貸又天  
下有銀之山必有銅鑛銅者可資于鼓鑄銀者兼益  
于民人權其重輕使務轉一天下自立山嶺以北見  
採銀坑並宜禁斷恐所在坑戶不免失業各委本州  
府長吏勸課合其採銅助官中鑄作仍委鹽鐵使條  
流聞奏 四年閏三月勅京城將用錢每貫額除二  
十文陌內欠錢及有鉛錫錢等正元九年三月二十



六日勅陌內欠錢法當禁斷慮因跡搨或亦生奸使人易從切于不擾自今以後有交開用欠陌錢者宜但令本行頭及居停住人牙人等檢察送官如有容隱兼許賣物領錢人糾告其行頭至人牙人重加科罪府縣所由祇承人等並不須于擾若非回買賣自將于街衢行者一切無問其年六月勅山領已北所有銀坑依前任百姓開採禁見錢出領六年二月制乞弘交易十貫錢已上即須監用足段委度支鹽鐵使及京兆尹即其作分数條流聞奏茶商等公私使換見錢並須禁斷其年三月河東節度使

王鏐奏請于當管蔚州界加置爐鑄銅錢廢管內錫  
詔許之仍令加至五爐

七年五月兵部尚書判戶部事王紹戶部侍郎判度支盧坦鹽鐵使王播等奏伏以京都將用多重見錢官中交計近日殊少蓋緣比來不許商人使換日茲家有滯藏所以物價轉輕錢多不出臣等今商量伏請許令商人于戶部度支鹽鐵三司任便換見錢一切依舊禁約伏以比來諸司諸使等成有便商人錢多留城中逐時收貯積藏私室无復流通伏請自今以後嚴加禁約從之八年四月勅以錢重貨輕出



內庫五十萬貫令兩常車收市布泉每足段估加十之一 十一年九月勅今後應內外支用錢宜每貫除墊一伯外量抽五十文仍委本道本司本使據數逐季收計其諸道錢便差綱部送度支收管以備軍須時以淮西用兵從有司之請也

十二年正月勅泉貨之設故有常規將使重輕得宜是資歛散有節必通其變以利于人今緡帛轉賤公私俱弊宜出見錢五十萬貫令京兆府揀擇要便處開場依市價交易選清強官吏

司先作處置條件聞奏必使事堪經久法可通行又

勅近日布帛轉輕見錢漸少皆緣所在擁塞不得通流宜令京城內自文武寮不問品秩高下并公郡縣主中使等下至士庶商旅寺觀坊市所有私鑄貯見錢並不過得五十貫如有過此許從勅出後限一月內任將市別物收貯如錢數校多處置未了其任便于限內于地界州縣陳狀更請限縱有此色亦不得過兩月若一家內別有宅舍店鋪等所貯錢並須計同此數其兄弟本來異居曾經分析者不在此限如限滿後有誤犯者自身人等宜付所司決痛杖一頓處死其文武官及王公並委府司聞奏當重糾貶戚



屬中使亦具名銜聞奏其鑽貯錢不限多少並勒納  
官數內五分取一分充賞錢上于五十貫此外察獲  
及有人論告亦重科取并量給告者將京師里開區  
肆所多方錢如王諤韓宋李惟簡少者不下五十萬  
貫于是競買弟屋以變其錢多者竟巷鑪就以歸其  
重而高貲大賈者多依倚左右軍官錢為否府縣不  
得窮檢法竟不行

十四年六月勅應屬諸軍使有犯時用錢每貫除二  
十文足陌內欠錢又有鉛錫銅者宜令京兆府枷項  
收禁牒報本軍令使府司差人就軍及看決二十如

情狀難容復有違拒者仍令司聞奏

十五年八月中書門下奏伏準庫官所議鑄錢或請  
收市人間銅物令州縣鑄錢當開元以前監鐵使未  
置亦令州縣與當置鑄造今有若兩稅盡足段或慮  
兼要道用見錢欲令諸道公私銅器各納所在節度  
團練防禦經畧使據元勅給與價直並納兩稅仍令  
本處軍人鎔鑄其鑄本請以留州使年支米月物充  
鑄錢使充軍府州縣公用當處軍人自有糧賜亦校  
省本所資衆力并收衆銅天下併上速濟時用待一  
年後鑄器物盡則停其州府有出銅鉛可以開爐鑄



處具申有司令開諸監治例每年與本充鑄其收市  
銅器期限並禁鑄造買賣銅物等待議定便令有司  
條流聞奏其工部鑄錢及收銅器請各處分將須行  
尚資周慮請申中書門下兩省御史臺并諸用長官  
商量重議聞奏從之

寶曆元年八月勅銷鑄見錢為佛像者同盜鑄錢論  
長慶元年九月勅泉貨之義所貴流通如聞比來用  
錢所在陌除不一與其禁人之必犯未若從俗之所  
宜交易往來務令可守其外內公外給用錢從今以  
後宜每貫除墊一例八十九陌二十文成貫不得更

有加除及陌內欠少

太和三年六月中書門下奏準元和四年閏三月勅  
應有鎔錫錢並合納官府人糺得一錢賞百錢中書  
門下奏當時勅條貴在峻切本許事寔必不可行祇  
如告一錢賞百錢則有告一百貫錫錢須賞一萬貫  
銅錢執此而行是無畔除昨因任清等犯罪施行不  
得遂叅酌事理量倩刑賞或恐已後更有犯者宜立  
節文令可遵守臣等商量自今已後有用鉛錫錢交  
易者一貫以下以州府常行杖決脊杖二十十貫以  
下決六十徒三年過十貫以上所在集衆決殺其受



鉛錫錢交易者亦準此處分其所用鉛錫錢仍納官  
其能糾告者每貫賞錢五十文不滿一貫準此例累  
賞止于三百千仍取其官錢給付其所犯人罪不至  
死者仍徵家資充其錢數其元和四年閏二月勅使  
望刑去勅二日依奏四年十一月勅應私鑄見錢家  
除口貯數外一萬貫至十萬貫即一周年內處置畢  
十萬至二十萬貫以下者限二周年內處置畢如有  
不守期限安然蓄積過本限即任人糾告給所由覺  
察其所犯家錢並準元和十二年勅納官數五分  
取一分充賞糾告人賞錢數正于五十貫應犯錢法

人色自決斷科取準元和十二年勅處分其所由覺  
察亦其一半事竟不行五年二月鹽鐵使奏湖管  
內諸州百姓私鑄告到錢伏緣衡道數州連接嶺南  
山洞深處百姓依摸監司錢據競鑄成脆惡奸錢轉  
行賤價博易與好錢相和行用其江西鄂岳桂管嶺  
道南等道應有出銅錫之處亦慮私鑄監錢並請委  
本道觀察使條流禁絕勅旨宜依  
會昌六年二月勅緣諸道鐵鑄佛像鐘磬等新錢已  
有次第須令舊錢流布絹價補增文武百寮俸料置  
起三月一日並給見錢其年先給虛估足段料估時



支給勅此緣錢重幣輕因令加鼓鑄必在流行通變  
勅時莫切于此宜申先甲之令以戒居貨之徒京城  
及諸道起今年十月已後公私行用並取新錢權停  
三數年有違犯銅用鉛錫惡錢例科斷其舊錢並納  
官事竟不行

天佑二年四月勅準向來事例每貫抽除外以八百  
五文為貫每陌八十五文如聞坊市之中多以八十  
為陌更有除折今後委河南府指揮市肆交易並須  
以八十五文為陌不得更改移

唐會要卷第八十九

唐會要卷第九十

推忠協謀佐理功臣光祿大夫守司空兼門  
下侍郎同中書門下平章事暨修國史上柱  
國太原郡開國公食邑二千戶寔封四百戶  
臣王溥纂

閉糴

和糴

食實封數

緣封雜記

內外官祿

閉糴

開元二年閏二月十八日勅年歲不稔有無須通所  
在州縣不得閉糴各令當處長使檢校



上元元年九月勅先緣諸道閉糴頻有處分如聞所  
在米粟尚未流通宜令諸節度觀察使各將管内足  
搨不得輒令閉糴

大曆十一年六月十三日勅自今已後所在一切不  
得閉糴及隔絕催稅正元九年正月詔諸州府不得  
輒有閉糴

太和三年九月勅河南河北諸道頻年水患重必兵  
役農耕多廢粒食未豐凡令使臣分路賑恤冀其有  
濟得接秋成今諸道穀尚未減賤而徐泗管内又遭  
水潦如聞江淮諸郡所在豐稔因于甚賤不當傷農

州縣長吏苟思自便潛設條約有令出界雖無明榜  
以避詔條布商旅不通米價異致令水旱之處種植  
兼資宜令御史臺揀擇御史一人于河南巡察使每  
道每州界首物價不等米商不行即是潛有約勒不  
必更待文牒為驗便具事狀及本界刺史縣令觀察  
判官名銜聞奏河南通商之後淮南諸郡米價漸起  
展轉連接之處直至江西南荆襄以來並須約勒  
依此舉勘聞奏仍各委觀察使審詳前後勅條與御  
史相知切加訪察不得容蔽咸通七年十月二十三  
日御史臺奏今後如有所在聞閉糴者長吏必加貶



降岑判官錄事參軍並停見任書下考仍為州縣各  
以版榜寫錄此條懸知百姓每道委觀察判官每州  
委錄事參軍旬當逐月不具閉糴事由中臺從之

### 和糴

證聖元年三月二十一日勅州縣軍司府官等不得  
輒取和糴物亦不得遣人替名代取

興元元年閏十月詔江淮之間連歲豐稔迫于供賦  
頗亦傷農收其有餘濟彼不足宜令度支于淮南浙  
東西道加價和糴三五十萬石差官般運于諸處減  
價出糴貴從權使以利于人

正元二年九月度支奏京北河南河中同華陝虢晉  
絳鄜坊丹延等州府夏秋糧稅青苗等錢物悉折糴  
麥所在儲積以備軍食京北府兼給錢收糴每計于  
時估外更加錢納于太倉詔可之其年十一月度支  
奏請于京北府折明年夏稅錢二十二萬四千貫文  
又請度支給添成四十萬貫令京北府今年內收糴  
粟麥五十萬石以備軍倉詔從之四年八月詔京北  
府于時價外加估和糴差清強官先給價直然後貯  
納續令所司自般運載太倉并差御史分路訪察有  
違勅文令長以下當重科貶先是京畿和糴多被抑



配或物估逾于價時或先毆而後給直追集停擁百姓苦之及聞是詔莫不歡忭樂輸焉

元和七年七月戶部侍郎判度支盧坦奏今冬諸州和糴貯粟澤潞四十萬石鄭滑易定各一十五萬石夏州萬石河陽一十萬石太原二十萬石以今秋豐稔必資蓄備其澤潞易定鄭滑河委本道差判官和糴各于時價每斗加十文所異人知勸農國有常備從之

長慶元年二月勅春農方興種植是切其京北京西糴使宜勒停先是度支以邊儲無備請置和糴使經

年無効徒擾邊人故罷之四年八月詔于關內及關外折糴和糴一百五十萬石用備飢歉其和糴價以戶部錢充收貯尋常不得支用

寶曆元年八月詔以兩京河西大稔委度支和糴二百萬斛以備災沴

大中六年五月勅自收開隴便討党項邊上生人皆失活業連屬艱食遂不寧居兼軍儲未得殷豐切在多方贍助今年京畿及西北邊稍似時熟即京畿人家竟搬運斛斛入城收為蓄積致使邊塞粟麥依前擁踊貴兼省司和糴亦須艱難其弊至深須有釐革



其京西北今年夏秋斛斛一切禁斷不得令入京畿  
為界 其年六月勅近新京北府京北斛斛入京如  
聞百姓多端以麥造麪入城貨易所費亦多切宜所  
在嚴加覺察不得容許

### 食實封數

舊例凡有功之臣賜實封者皆以課戶先準戶數州  
縣具國官邑官執帳供其租調各準配租調遠近州  
縣官司收其脚直然後所國邑官司其一準此入國  
邑者收其庸 安國相王太平公主各一萬戶神龍  
元年十一月六日勅安樂公主四千戶神龍元年十

二月二日勅長寧公主三千五百戶

衛王溫王各二千五百戶同上年月勅

寧王憲薛王業慶王潭恐王亨隸王洽鄂王清各二  
千戶開元二十一年四月一日勅

榮王琬已下各三千戶開元二十三年七月二十三

日勅

楚王豫一千戶至廣二年十二月十五日勅

雍王造二千戶寶應二年七月十一日勅

郭子儀二千戶大曆十四年閏五月十五日勅

渾城一千八百戶檢年月未得



裴寂一千五百戶正觀二十三年九月八日勅

荆王元二千五百戶武德九年十月八日勅

武三思一千五百戶神龍元年正月五日勅

李光弼一千五百戶寶德二年七月十一日勅

濮固懷恩一千五百戶同上年月勅

長孫無忌王君廓尉遲敬德房玄齡杜如晦並武德

九年十月八日勅至永徽元年十一月二十八日詔

房玄齡所封不須依例減降

新都宜城定安公主各一千三百戶並神龍元年十

月日勅

長孫順德柴紹羅藝趙郡王教公恭各一千二百戶

同上年月勅

王武俊一千二百戶檢勅未獲

劉弘基一千一百戶顯慶元年勅

李勣一千一百戶總章元年十二月勅

韓遊懷一千一百戶檢勅未獲

侯君集張公謹劉師立各一千戶武德九年十月八

日勅

武士彠一千戶顯慶四年七月勅

武攸暨一千戶神龍元年正月十八日勅



宣城公主一千戶神龍元年十二月二日勅

薛崇簡一千戶唐隆元年六月二十五日勅

邠王守禮一千戶唐隆元年七月四日勅

永穆公主一千戶開元十年勅

樂安土瑗開元二十四年七月十四日勅

高都公主已上各一千戶開元二十五年四月二十

七日勅

魚朝恩一千戶大曆五年三月勅

田承嗣一千戶大曆八年二月三日勅

高士廉段志玄各九百戶正觀元年勅

魏徵九百戶正觀十七年正月勅

李晟李元諫各九百戶檢勅未獲

李湛八百戶神龍元年正月十八日勅

李輔國八百戶寶應元年三月三日勅

宇文士秦叔寶程知節各一百戶正德九年十月八

日勅

李多祚敬暉栢彥範張柬之崔元暉並七百戶神龍

元年十二月二日勅

姜皎七百戶先天二年七月十八日勅

劉幽求七百戶先天二年八月十一日勅



馬燧七百戶唐朝臣五百五十戶檢勅未獲

安興貴安修仁唐儉實執屈突通蕭瑀封德彝劉義

節各六百戶武德九年十月八日勅

溫嘉順六百戶檢勅未獲

魏元忠五百五十戶神龍元年十二月二日勅

李靖五百戶正觀四年八月勅永徽二年十月九日

詔李靖所食封不須減

段秀實李抱真各五百戶興元二年二月勅

東仙竒五百戶正元二年四月勅以殺李希烈功也

李愬五百戶元和十二年十一月勅

劉悟五百戶元和十四年二月勅以殺李師道功也

田弘正三百戶張子良田少卿李奉仙各一百五十

戶元和二年十一月勅以擒李錡功也

史奉敬五十戶長慶元年二月勅以破吐蕃功也

### 緣封雜記

正觀二十三年九月八日勅諸王並宜食一千戶封

霍王元軌使國令衛封令自請依諸國賦貿易取利

元軌曰汝為國令當正吾說勿以所請物貴

神龍二年四月十四制功臣段志玄屈突通蕭瑀李

靖秦叔寶長孫順德劉弘基宇文士及錢九隴和程



知郎龐卿博暉竇琮苑君璋李于和張平高張公謹  
梁恪安修仁奏行師獨孤卿雲蕪定方李安遠鄭仁  
秦杜君綽李孟嘗等二十五家所食實封給並依封  
給其年十一月一日勅 皇太子<sub>在</sub>藩府日所食衛府  
封物每年便納東宮給事中盧燦駿奏曰伏以皇太  
子處繼明之重當主望之尊歲時限用自可有司供  
擬又據周禮諸司應財器歲終則會準王及太子不  
會此則諸蓄之費咸與王同今與列國諸侯齊衡入  
封豈所謂憲章古昔垂法將來者也上納其言十一  
月五日勅停景龍二年九月勅諸色應食寔封一定

已後不得輒有移改二年勅應食封邑者一百四十  
餘家應出封戶凡五十四州皆天下膏腴物產其安  
樂太平公主封又取富戶不在損免限百姓著封戶  
者甚于征行十一月河南巡使監察御史宋務光上  
疏曰臣聞分珪裂土各有方位通邑大都不以封錫  
前猷未遠古義亦深自頃命侯稍殊舊式莫居境塔  
專擇雄奧徐州貢土方色已垂寢丘辭封讓德六嗣  
且滑州者國之近甸密邇帝畿地出縑紈人多趨附  
所以列縣惟七分封有五王賦少于侯租入家倍于  
國輸求諸既往寔所未聞每科封丁有甚征義因而



失業莫返其居此土風逃者舊少頃日波散良緣封  
多伏願稍減封戶散配餘州下息波吐上尊古制則  
公侯不失于采地流巖得還于故鄉諸州封戶亦望  
準此又徵封使者往來相繼既勞傳驛甚擾公私請  
附租庸每年送納望停封使以靜下人仍編入新格  
庶為永例又聞五等崇崇百王盛典自非邢等茅  
戴冠鄧鴻勳無以誓彼山河疇其爵土近者封建頗  
緣恩澤功其橫草人已分茅遂使惡名壤藩多人侯  
國邑收家稅半于天府經費不足蓋亦有田竊見武  
德之初建侯故事于是天寶新定王業創開佐命如

雲謀臣如雨然而封者不過十數人今禮樂承平邦  
家繼世有象賢 舊之裔无野戰攻城之勤至于命  
封不合全廣論功謝于前業食邑名于往時既減邊  
儲宴虧國用伏惟酌宗周之前訓咨武德之舊章地  
匪宗盟勲殊社稷不宜加于寔邑自可寵以虛名如  
此則庶績其凝藝倫攸叙臣忝當庶問備採風謠見  
此不安豈敢自然知必被封家所疾願嘗以報國為  
心乞擇愚言訪諸朝宰秋毫有益夕死无恨兵部尚  
書韋嗣立上疏曰臣竊見食封之家其數甚衆昨聞  
戶部云用六千餘萬丁一丁兩支計一百二十萬足



已上臣頃在太府知每年庸調絹數多不過百萬少則七八十萬以來比諸封家所入全少臣聞自古封茅土裂山河皆須業著經綸功申卓昧然後配宗廟之享承帶礪之恩徃者皇建之初功臣其定天下當食終祇三二十家今以恩澤受封至百十四家已上國家租賦大半私門私門資用有餘國家支計不足有餘則或是官典或是奴僕多挾勢騁威凌突州縣凡是封戶不勝侵漁若戶必恨丁物送太府封家但于古藏請受不得輒自徵催則必免侵漁人冀蘓息唐隆元年六月十三日勅安國相王鎮國太平公主

宜各食一州全封其州公主自簡

太極元年正月制皇太子妃王氏預聞秘策潛圖義舉父仁皎食實封三百戶

開元三年五月勅封家總合送入京其中有別勅許人就領者待州徵足然後一時分付徵未足聞封家人不得輒列出封州亦不得因有舉放違者禁身聞奏

四年三月十八日宰臣奏封諸國請自始封至魯孫者其封戶三分減一制可也

十年十一月勅中書門下宜共食寔封三百戶自我



禮賢為百代法其年加永穆公主封一千戶初永穆等各分五百戶左右以為太傅上曰百姓租賦非吾有也斯此宗廟社稷蒼生是為爾邊隅戰士出萬死不顧一生所賞賜總不過一二十足此輩何功于人頓食厚封約之使知儉嗇不亦可乎左右以長公主皆二千戶請與比上曰吾嘗讀後漢書見明帝曰朕子不敢望先帝車服皆下之吾嘗不廢卷歎息汝奈何欲人此輩望長公主乎左右不敢復言至是公主等車服始不給故加焉一自後公主皆封一千戶遂成其利至乾元元年三月一日諸公主宜各給五百

戶郡主縣主據元賜戶數三分各給二分並以宣越明衡婺等州給

年五月十日勅請諸食實封並以下為限不須一分入官其物仍令出封州隨庸調送入京其脚以租脚錢充並于太府寺納然後準給封家其年九月十二日勅親王公主等封物宜隨官庸調隨駕所在送至京都賜坊令封家就坊請受餘食封家不在此限仍令御史一人及太府寺官檢校分付使給了牒二十二年九月勅諸王公以下食封堯子孫應承襲者除喪後十分減二仍其所食戶數奏聞無後者百



日後除諸名山大川及畿內縣並不封

天寶六年三月六日戶部奏諸道請食封人準長行二百一百戶以下戶部給符就郡請受三百戶以上附庸使送西京太府寺賜坊給付者今緣就州請受有損于人今三百戶以下尚許彼請公私之間未免侵擾望一切送至西京就此給付即公私省便侵損無由有入準戶部式節文諸式食封人身後已後所得封物隨其男數為分承嫡者加一分至玄孫即不在分限其封總入承嫡房一依上為分者有如此則玄孫諸物比于嫡男計數之間多校數倍舉輕明重息勲庸无替

理實未通望請至玄孫已下準玄孫直下一房許依令式餘並請停唯享祭一分百代不易自然爭競永永泰二年正月十六日勅自今已後子孫襲實封宜減半永為恒式至三月十八日勅應請封家三分給二待兵策稍寧即當全給大曆十一年九月二十四日勅諸公主封物公主薨後三年不須停

興元元年正月勅諸軍諸道諸使應付奉天及進收京城將士守或百年擁敵或萬里勤王扞國金城驅



除大憝濟危難者其節著復社稷者其業榮我圖有  
功特加彝典錫名疇賦永代无窮宜並賜名奉天定  
難功臣其有食實封者子孫相繼代々不絕

正元二年五月故尚父汾陽王子儀實封二千戶宜  
準式減半餘以分襲暖月襲代國公通府襲三百戶  
晞可二百五十戶曙可襲二百五十戶暎可襲二百  
二十五戶

七年三月戶部奏伏以周漢故事有功即加地有罪  
即奪國既明質罰方申沮觀其犯除名以上罪有實  
封準法合除比來因循無不申舉自今以後應實封

人或人緣罪犯其堂省及本軍本使本貫奏狀請令  
並標食封戶數本配州名同奏勅下戶部以為平據  
其犯徒罪三分望奪一分流罪奪一半除名以上罪  
即準法悉除並以本犯條論不在減贖之限其奉特  
勅貶謫稔制詞內所犯无正條者伏請準流罪奪一  
半勅旨依奏

其年十一月勅諸公至每年各給封物七百端足此  
依舊例春秋兩限支給諸郡主每季各賜錢一百貫  
文縣主每季各賜錢七十貫文

八年八月戶部奏準正元七年三月二十日勅節文



比來食實封人多不依令式皆身沒之後子孫自申請傳襲伏請自今以後并今日以前應食寔封人并一年內準式具合襲子孫官品年名并母氏嫡庶于本貫陳牒如无本貫即於食封人本任本使申牒如合襲人有罪疾及身死者亦限一周年內申牒請立以次合襲人仍具家口陳牒請附籍帳本貫勘責當家及近親如寔是嫡長即與責保準式附貫然後申省到後即取文武職事三品正員一人充保勅旨宜依

二十一年七月六日勅應食實封其節度使宜令百戶給八百端足若是絹兼給綿六百兩伏以寔封本回賞功封之多少視功之厚薄不以官位散要別置等差其節度使兼宰相準正元二十年以前舊例處分從之

元和四年六月戶部侍郎判度支李夷簡奏應給食實封官自正元十三年以後節度使宰相每百戶給八百端足若是絹更給綿六百兩節度使下兼宰相每百戶給四百足軍使及金吾諸衛將軍大將軍每百戶給二百五十端足

內外官祿



武德元年十二月隨制文武官給祿正一品七百石  
從一品六百石正二品五百石從二品四百六十石  
正三品四百石從三品三百六十石正四品三百石  
從四品二百六十石正五品二百石從五品一百十  
石正六品一百石從六品九十石正七品八十石從  
七品七十石正八品六十石從八品五十石正九品  
四十石從九品三十石並每年給

正觀二年二月二十日詔官人得上考給一季祿至  
三年正月十一日官得上下其年六月詔官人出使  
皆廩其妻子至十二月詔外官新任多有匱乏準品

### 計日給糧

八年中書舍人高季輔上表曰任以應務亦以代耕  
外官卑品猶未得祿既離鄉井理必貧煎但妻子之  
戀賢其猶累懷飢寒之切夷惠罕全其行為正之  
道期于易從者不恤其匱乏唯欲利其清儉凡在末  
品中庸者多正恐巡察歲出輜軒繼軌不能肅其侵  
漁何以永其改術今求古漸殷廩倉已寔斟酌量給祿  
使得養親然以後督以嚴科貴其報効則庶官畢力  
議勿斯允

永徽元年八月詔文武五品以上斛官充侍者宜準



致仕人例給半祿光宅元年十月二十日勅諸內外  
官祿科賜會二事已上皆據上口給新授官未上所  
司及承勅使差充使者祿科并考第一事已上並不  
在與限如別勅應差使者京官以勅出日外官以勅  
符到日為上日若新授引仍直諸司者上日同京官  
即舊人應替先別勅定名充使未迴兩應給而無正  
課科者以當處官科充職由據新人上日為斷不給  
別舊人因使應別給者經一季雖未了不在給限其  
制勅授官雖勅符先到未上者舊人無犯不在停限  
天寶二年十一月十六日勅京官兼太守等官俸科

兩給者宜停其外官太守兼京官除準式親王帶京  
官任外官副大將軍副使知軍及正事京官兼內外  
官知政事據文合兼給者餘並從一處給任遂穩便  
十四年八月勅在京文武九品已上正員官既親于  
職務可謂勤王自今已後每月給俸食雜用防閣度  
僕等宜十分為率加二分其官加一分仍永為常式  
至德二年四月勅天下郡府及縣官祿自直品子等  
謂從今年正月一日已後並量給一半事平之後當  
續支還

正元七年十二月勅郡主壻授檢校四品京官戶部



每月給料錢三十貫文度支給祿粟一百二十石縣  
主簿檢校五品京官戶部每月給料錢一十貫文度  
支給祿米一百石

大中三年九月勅秦州刺史祿粟每月給五十一石  
原州威州刺史祿粟每月各給四十一石

唐會要卷第九十

唐會要卷第九十一

推忠協謀佐理功臣光祿大夫守司空兼門  
下侍郎同中書門下平章事暨修國史上柱

國太原郡開國公食邑二千戶寔封四百戶  
臣王溥纂

內外官料錢上

內外官料錢上

武德已後國家倉庫猶虛應京官料錢並給公廨本  
今當司令使番官廻易給利計官員多少分給  
正觀十二年二月諫議大夫褚遂良上疏曰為政之



本在于擇人不正其源遂差千里漢家以明經拜職  
或四科辟召必擇器任使量才命官然則市井子孫  
不居官吏大唐制令憲章古昔商賈之人亦不居官  
位陛下近許諸司令史捉公廨本錢諸司取比邑人  
號為捉錢令史不簡性識寧論書藝但令身能估  
販家足貲財錄牒吏部即依補擬大率人捉五十貫  
已下四十貫已上任居市肆恣其販易每月納利四  
十一年凡輸五萬送利不違年滿受職然有國家者  
當笑漢代賣官今開此路頗類于彼在京七十餘司  
相率司別九人更三載後年別即有六百餘人輸利

受職伏惟陛下理致升平任賢為政或文學高第或  
諸州進士皆策同片玉經營懸河奉先聖之格言慕  
昔賢之廉恥拔十取五量能授官然犯禁違公輒  
懼法况乎捉錢令史主佑販志意分毫之末耳目屢  
肆之間輸錢于官以獲品秩荏苒年歲陛下能不使  
用之乎此人習以性成慣于求利苟得無恥兼蹈廉  
隅便其官職從何將來之弊宜絕本源臣每周遊人  
間為國聽京司寮庶爰及外官異口同詞皆言不便  
伏願勅朝臣遣其詳議上納之其月二十三日勅並  
停改署胥士七千人以諸州上戶充准防閑例輸課



二年一替計官員多少分給之二十一年二月七日  
今在京諸司依舊制公廨給錢充本置令史府史胥  
士等廻易取利以充官人俸  
永徽元年四月二日廢京官諸司捉錢庶士其官俸  
料以諸州租脚價充  
麟德二年八月十九日文武五品已上同武職班給  
伏身以掌閑募士充之  
咸亨元年四月十二日停給  
乾封元年八月十二日京文武官應給防閣庶不俸  
料始依職事品其課及賜各依本品

儀鳳三年八月二日勅廩食所費同資于上農歲俸  
所頒並課于編戶因地出賦則沃瘠未均據丁收物  
則勞逸不等俾之富教其可得乎永念于斯載懷矜  
創如文武內外官應給俸料課錢及公廨料度封戶  
租調等遠近不均貴賤有異輸納簡選事甚難運送  
脚錢損費寔廣公廨出舉廻易典吏曰比侵漁字之  
方豈合如此宜令王公已下百姓已上率口出錢以  
充防閣庶僕邑士白直折衛府伏身并封戶內官人  
俸食等料既依戶次貧富有殊載詳職務繁簡不類  
率錢給用須有差宜具條例并各遂使



光宅元年九月以京官八品九品俸料薄諸八品每  
年給庶僕三人九品從二人  
長壽三年三月豆盧欽望請輟京官九品以上兩月  
俸物以助軍左拾遺王永秦曰陛下富有四海足以  
儲蓄軍國之用何籍貧京官九品俸而令欽望欺奪  
之臣切不取欽望執曰秦漢皆有稅等以贍永禮不  
識大體安有爭議永禮曰秦皇漢武稅天下使虛空  
以事邊奈何使聖朝倣習也不知欽望此言是識大  
體耶遂寢不行

開元元年七月秘書少監崔沔議州縣官月料錢狀

曰養賢之祿國用尤光取齊人未為剥下何用立本  
息利法商永資皇運之初務革託本取利以繩富家  
乃一切權宜諒非輕道彝典頃以州縣典吏併捉  
官錢收剩數多破產者衆散諸編戶本少利輕人用  
小體時以使付本收利惠及于人然則議國事者亦  
當憂人為謀恤下立計天下州縣積數既大抵皆然  
為害不少且五千之本七分生利一年所輸四千二  
百兼等勞費不啻五千在于平人已為重賦富戶既  
免其徭貧戶則受其弊傷人刻下俱在其中未若大  
率群官通計衆戶據官定料均戶出資常年發賦之



時每丁量加升尺以近及遠損有兼無合而籌之聽  
增益少不擾簡而易從庶乎流亡漸歸倉庫稍寔則  
當咸出正賦罷所新加天下坦然十一而稅上下各  
足其不遠乎十年正月二十一日今有司收天下公  
廩錢其官人料以萬戶稅錢充每月準舊分利數給  
至二十二日省王公以下視品官參估及五品已上  
伏身職員十六年十一月十五日勅文武百官俸  
料所給物宜依時價給十八年九月四日御史大夫  
李朝隱奏請薄稅一年稅錢充本依舊令高戶典正  
捉隨月收利供官人料錢二十二年四月十四日勅

京官兼外州都督刺史大都督府長史俸料並宜兩  
給至天寶二年十一月十六日勅京官兼太守等官  
俸料兩給者宜停其外官太守兼京官準武親王帶  
京官任外官副大將軍副大使知軍及知政事京官  
兼外官知政事據文合兼給者餘並從一處給仍任  
遂隱便二十四年六月二十三日勅百官料錢宜合  
為一色都以月俸為名各據本官隨月給付其貯果  
宜令入祿數同中應合減折及申請時限並依常式  
一品三十一千月俸八千食料一千八百防閣二十  
千雜用一千二百文



二品二十四千月俸六千食料一千五百防閣十五  
千雜用一千文

三品十七千月俸五千食料一千一百防閣一十千  
雜用九百文

四品一十一千八百六十七文月俸四千五百食料  
七百防閣六千六百文雜用六百文

五品九千二百月俸三千食料六百防閣五千雜用  
五百文

六品五千三百月俸二千三百食料四百庶僕二千  
二百雜用四百文

七品四千五百月俸一千五百七十食料三百五十

庶僕一千六百雜用三百五十文

八品二千四百七十五文月俸一千三百食料三百

庶僕六百二十五文雜用二百五十文

九品一千九百一十七文月俸一千五十食料二百

五十庶僕四百一十七文雜用二百文

天寶三年十月三日勅郡縣閑職錢送納太府等自  
今已後納當都克員外官料錢不足即取王官料錢  
分若無員外官當縣分五年三月二十日勅郡縣官  
人及公廨白直天下約計一載破十萬丁已上一丁



每月輸錢二百八文每至月初當處徵納送縣來往數日功程在于百姓尤是重後其郡縣白直計數多少請用料錢加稅充用其應差丁充白直望請並傳一免百姓難卒二省國家丁壯十四年八月四日詔文武九品已上官員既親職務可謂勤心自今已後每月給俸食料雜用防閣庶僕等宜十分加二分其同正官加一分仍永為常式至德二年已後內外官並不給料錢

乾元元年外官給半料與職田不給料仍勅度支使量閑劇司給手力課員外官一切無料至二年九月五日詔京兆無俸料桂玉之費將何以堪宜取絳州新錢給冬季料即仰所由申請計會支給其艱難之際家國是同頃者給在軍戎所以久虧祿俸眷言憂恤恒愧于懷今甫及授衣畧為賙給庶資時要宜悉朕懷

大曆十二年四月二十八日度支奏給京百司文武官及京兆府縣官每月料錢等具件如後

太師太傅太保太尉司徒司空侍中中書令每月各一百二十貫中書門下侍郎各一百二十貫東宮三太左右僕射各八十貫東宮三少各七十貫尚書御史大夫太常卿各六十貫



文常侍宗正卿太子詹事國子祭酒各五十左右丞  
及諸司侍郎給事中舍人中丞賓客殿中監書監司  
農等卿將作等監各四十太子左右庶子太常少卿  
各四十諫議諸司少卿少監各三十國子司業內侍  
東宮三卿各三十郎中侍御史司天監少詹事諸王  
傅國子博士諭德中允中舍殿中祕書太常宗正丞  
中郎御史著作郎大理正都水使者總監內常  
侍內納事各二十員外郎通事舍人起居王府長史  
各十八監察御史臺主簿補闕王府司馬司天少監  
太子典內太常博士主簿宗正主簿門士錄事中書

主書各十五拾遺司議太子文學祕書著作佐郎國  
子太學四門廣文等博士大理司直詹事府丞及諸  
事監丞謁者監中書門下主事各十二洗馬贊善諸  
寺監主簿詹事府司直各十評事各八諸校正各六  
諸奉御九成宮總監諸王諮議及諸陵令各九城  
門符寶國子助教六局郎三府掾屬太常侍醫文學  
錄士參軍主簿記室諸衛及六軍長史兩市令諸副  
總監武庫署令太公廟令各五太子通事舍人東  
宮寺丞太學廣文助教內坊丞諸直長內寺伯千牛  
衛及諸率府長史諸陵丞諸陵署諸王府判司司行



溫泉監尚書都士都水及諸總監丞司天臺丞太子  
侍醫諸司上局署令王府國令苑四面副監公主邑  
司令各四貫一百文國子四門助教律醫學博士協律  
郎內謁者諸衛六軍左右衛率府等衛佐諸王府參  
軍大農都省兵吏禮考功主事春坊錄事司行副監  
諸司中局署令都水主簿諸司上局署令及監廟邑  
司丞司天臺靈臺郎保章挈壺正太常針醫監尚藥  
局司監各千四百七十文太祝奉禮省中諸行主事門下典  
儀御史臺殿中秘書內侍省春坊詹事府主事諸寺  
監諸衛六軍諸司錄事諸司中局署丞及大理獄丞

諸司監作監事諸率府錄事殿中書醫佐食醫奉輦  
司庫司廩奉乘鴻臚寺掌客司儀太僕寺主乘內坊  
典百一司天臺司辰司曆監內侍府宮教博士東宮  
三寺主簿太常大樂鼓吹丞醫正按摩咒禁卜筮博  
士及針醫卜助教國子書等宴士及助教諸王府國  
丞尉諸總監主簿各一千九百一十七文武官左右金吾衛大  
將軍各四百文六軍大將軍左右金吾將軍各三十文諸  
衛及六軍中郎諸率府率副各一百六十七文諸衛及六  
軍郎軍將諸王府典軍副典軍各九百文諸衛及六軍  
司陞千牛及左右備身各五百文諸衛及六軍中侯太



子千牛各十四千文一百諸衛及六軍司戈太子備身各  
千四百一諸衛及六軍執戟及長上各一千九百京  
兆及諸府尹各八千少尹兩縣令各五十奉先昭應  
醴泉等縣令司錄各四十畿令各四十判司兩縣丞  
各三十兩縣簿尉奉先等縣丞各三十奉先縣簿尉  
諸畿令各二十畿簿尉各二十參軍文學博士錄事  
各二十貫文

應給百司正員文武官月料錢外官員准式例合支

給料錢如後

檢校官同中書門下平章事每月一百一十貫文准  
大曆十二年六月七日

勅檢校官同中書門下平章殿中省進馬准開元十  
事并同正官例就一高處給殿中省進馬七年五月十  
十錢日勅置每人准二月納僕寺進馬以殿中內侍  
料錢一萬九千九百一十七文

省每月四省監以諸少度支奏約加一十五萬六

千貫文准舊給都當二十六萬貫文來伏望准數起

六月一日給付勅旨依仍令所司起五月一日支給

待豐年無事即准常式處分至六月七日戶部侍郎

判度支韓混奏准今年四月二十八日恩勅如給京

文武官九品已上正元官月俸其目中書門下平章

事不帶正官勅內無額應檢校官同中書門下平章  
事並請同正官例就一高處給勅旨依至



建中二年閏正月四日文武百官每月料錢一百貫  
以上者三分減八掌輦太僕王乘寺典乘軍衛率府  
親勳翌府兵曹典膳兩令司天臺司農司曆監侯內  
坊典直內侍省官教博士太常寺樂正及醫卜正九  
品陵廟丞苑四面監丞王府國丞尉按摩咒禁卜筮  
博士及針醫助教諸總主簿國子書等及律助教各  
十千八百五十六員武官七十二員四品各十七千  
文二百三十六員五品各八百三十九員六品各  
千九百九十八員七品各六百一十一員八品各  
五百五十八員九品各二百三十六員  
八品各三千七百五十五員八員九品各二千五百  
分

並雜給校簿每貫加五百文支給一十六員諸衛上  
將軍左右衛本料各六十千加料四等每月各糧米  
五勺手力七人資二千五百文私馬五匹草三百束料  
九石七斗五升隨身十五人糧米九石鹽一斗一升  
二合五勺春衣布一十五端絹二十足冬二員左右  
衣絕紬一十五足絹三十足綿三十屯  
金吾衛並准一十二員左右武衛等本料五十五千  
加糧料等每百三手力五人資六千五百私馬四匹草  
糧米七石八斗春衣布十三端絹二十四足一十六  
冬衣絕紬十八斗春衣布二十六足綿二十四屯一十六  
員諸衛大將軍左右衛左右金吾衛本料四十千五  
百續加等隨物隨人減料一人左右武衛等雜衛本料  
三十六千文續加等馬三月草一百六十束料四石



九斗五升隨身十人糧米六石春衣布三十員諸衛  
一十疋冬衣絕細十疋綿二十七屯  
將軍左右金吾衛本料三十六千續加准左右武衛  
等雜衛本料三十六千續加等每月手力各二人資  
草一百一十束料三十六疋冬衣絕八人糧米四石八  
斗春衣布八端絹十六疋冬衣絕八人糧米四石八  
屯六員統軍本料各六十五千加續等月春衣一付每  
鹽七合五勺私馬五匹草糧隨軍金六員大將軍本料  
吾同金吾隨身餘准諸衛上將軍六員大將軍本料  
六十千文續加大將軍六軍將軍本料三十千續  
加准左武等射主神策大將軍本料五十六千文續  
加雜衛將軍射主神策大將軍本料五十六千文續  
私馬五匹草糧隨軍金六員大將軍本料五十六千文續  
加料七人給糧米四石冬衣絕一斗五升春衣布十  
十四疋絹二十八疋鞋十重冬衣絕一斗五升春衣布十  
十四疋絹二十八疋鞋十重冬衣絕一斗五升春衣布十

本料三十千文續加私馬六人給衣不給糧八人全給  
糧米三石六斗鹽九升春衣布二十二疋端絹二十四疋  
鞋十二重冬衣絕細十升春衣布二十二疋端絹二十四疋  
屯京兆府縣官大曆十年四月二十五日勅右中  
書門下准去年十一月二十八日勅京官宜加料錢  
准勅商量謹條件如前勅旨依其年五月中書門下  
奏得蘇州刺史兼御史大夫知臺事李涵東都河南  
江淮山南等道轉運使兵部兼御史大夫劉蔓戶部  
侍郎專判度支韓滉守狀釐革諸道觀察使團練及  
判官錢觀察使在加給限每月除刺史正俸料外每  
使每月請給一百貫文雜給准時價不得過五貫文



都團練副使每月料錢八十貫文雜給准時價不得  
過三十貫文觀察判官與團練判官同都每月料錢四十貫  
文准官每月料錢三十貫文巡官准觀察推官例已  
上每員每月雜給准時價不得過二十貫文如州縣  
見任官充者月給料雜給減半刺史知軍事每月除  
正俸外請給七十貫文如帶別使不在加限雜給准  
時估不得過二十貫文州縣給料准其大都督府長史  
同准上州別駕刺史八十貫文別駕五十五貫文長  
史司馬各五十貫錄事參軍四十貫判司三十貫參  
軍博士各一十五貫錄事市令各一十三貫縣令四

十貫丞三十貫尉簿各二十貫右謹具條件如前其  
舊准令月俸雜料紙筆執衣白直值納資諫等色並  
在此數內其七府准四月二十八日勅文不該者並  
請依京兆例處分其中州中縣已下三分減一分其  
額內釐務比正官減半其州縣官除差充推官巡官  
及司馬掌軍事外如更別帶職亦加不給限勅旨宜  
依

建中四年正月宰臣常袞與同對揚綰道不同先是  
百官俸料寡薄綰以袞奏請加之時滉判度支袞以  
滉各騁私懷所加俸料厚薄由已多時諸少列各定



月俸料為三十五千滉怒司業張參惟止給三十千  
袞惡少詹事趙甚給二十五千又太子洗馬視司經  
局長官文學為之貳袞有親戚任文學者給二十千  
而給洗馬十千其輕重任情不通時政多如此類  
興元元年十二月詔京百官及畿內官料俸准元數  
支給自幸奉天後運路阻絕百官俸料或至闕絕至  
是全給從之

正元三年六月中書侍郎同平章事李泌奏加百官  
俸料各具品秩以定月俸隨曹署閑劇加置乎力資  
課雜職等議者稱之十年二月詔應文武朝官有薨

卒者自今已後其月俸料宜皆全給仍更准本官一  
月俸錢以為賻贈若諸三品已上官及尚書省四品  
官仍令有司舉舊令聞奏行弔祭禮務從優備初左  
庶子雷咸以是月朔卒有司以故事計其月俸以日  
數給之上聞之故有是命十五年十二月詔今年十  
月三日權減諸道諸州刺史判軍事料及專知別當  
官加手力課并減州縣官手力門倉庫獄囚子驛館  
廨宇等錢宜一切卻仍舊初獻計者言收諸道軍事  
錢及手力資課等當得百數十萬貫可以助軍于頔  
時判支又贊成之及算計大數止于三十萬貫而數



中更有耗折雜破纔得十餘萬貫輿議甚以為不便  
韋臯張建封又相次素言所得甚微所失體大又用  
此人心頗不安故今復古

元和六年閏十二月勅河東河中鳳陽易定四道州  
縣殘破俸給至微吏曹注官將同北遠在于物體切  
要均融宜以戶部錢五萬五千貫充加四道州縣官  
課七年五月加賜澤潞磁邢名五州府縣官料錢二  
萬貫文其年十二月以麟坊邠三州官吏近邊俸薄  
各賜料錢其年中書門下奏國家舊章依品制俸官  
一品月俸三十千其餘職田祿米大約不過千石自

一品以下多少可知艱難以來網禁漸弛于是增置  
使頗厚請俸錢故大曆中權臣月俸有至九千貫者  
列郡刺史無大小給皆千貫常袞為相始立限約至  
李泌又量其閑劇隨事增加時謂通濟理難減削然  
有名存職廢額去俸存閑劇之間厚薄頓異將請定  
式須立常規制從之乃命給事中段平仲中書舍人  
常貫之兵部侍郎許孟容戶部侍郎李絳等詳定減  
加從之十二年四月勅京百官俸錢從五月以後並  
宜給見錢其數內一半充給元估足段者即據時估  
實數廻給見錢其年十一月勅工部尚書邢士美以



疾未任赴京宜就東都將息疾捐日赴任其料錢準  
上官例令有司支給十三年六月以德棣滄景四州  
值遭水潦給復一年遂定四州官吏俸錢料刺史每  
月一百五十千望緊上縣令每月四十千餘有差十  
四年四月重定准西州縣俸祿以蔡州為緊刺史月  
俸一百八十千申光州為中刺史月俸一百五十千  
長史已下有差十五年六月勅曰朕聞帝王所重者  
國體所切者人情苟得其體必臻于太和如失其情  
是由于小利况設官求理頒祿責功既有常規寧宜  
就減近者以每歲經費糧入外官俸料據數抽貫朕

再三思度中所未安念彼遐方或從卑官一家所給  
三載言歸在公當甘于廉潔受祿又苦于減尅待  
我度吏豈其然乎雖憂國之誠固須瞻取而恤人之  
虞干戈未戢事非獲已慮將起怨咨必為水旱人亦  
何辭今則幸遇豐登又方寧謐九州之內永絕妖氛  
三邊之士異除烽驚自宜尅已以足用安可剥下而  
謀安臨軒載寔所增愧其度支所準五月二日勅應  
給用錢每貫扣五十文都計一百五十萬貫文並宜  
停初宰相以國用不足故權請扣減課官及言事者  
累陳表章以為非便故復下此詔以罷之



唐會要卷第九十一

唐會要卷第九十二

推忠協謀佐理功臣光祿大夫守司空兼門

下侍郎同中書門下平章事暨修國史上柱

國太原郡開國公食邑二千戶實封四百戶

臣王溥纂

內外官料錢下

諸司諸色本錢上

內外官料錢下

長慶二年十月勅司徒兼中書令韓弘疾未全平尚  
須在假將息其俸料宜從勅下日使令所司支給四



年五月勅近日訪聞京城米價稍貴須有通變以公濟私宜令戶部應給百官俸料其中一半合給段足者廻給官中所糴粟每斗折錢五十文其段足委別貯至冬糴粟填納太倉時人以為甚便

太和四年七月勅吏部奏應比遠道州縣官課料請令依元額科料支給不得更有欠折勅旨依奏其年七月勅應外任官帶一品正官京縱不知政事且依俸料宜付所司並令兼給七年二月戶部侍郎庾敬體奏應文武九品已上每月料錢一半合給段足絲綿等伏以自冬涉春久無雨雪米價少貴人心未安

自德音放免逋懸賑恤貧中外群庶已感皇慈至于衣冠之家素乏儲蓄朝夕取給猶足為憂以臣愚見若令本官料錢內一半停給段足絲綿等廻給太倉粟每斗計七十文在眾庶必見懽康于公家無所虧減待至麥熟米價稍賤即依前却給段足等酌于事理庶叶變通勅旨宜依八年八月劔南東川觀察使楊嗣復奏管內普合渝三州刺史元請料錢每月各四十五貫請各添至六十貫勅旨依奏九年六月勅宰相俸料宜依元和十四年以前舊例並給見錢開成二年八月戶部侍郎李班奏京諸司六品已下



官請假徃外府建假不到本官停給料錢勅旨違限  
停料俸餘依準令式四年三月勅侍講學士兼太子  
少師王起宜兼給料錢五年三月中書門下奏準今  
年二月八日赦節文應京諸司勒留官令本處刻留  
手力雜給錢典攝官者臣等檢詳諸道正官料價錢  
絕少雜給手力即多今正官勒留亦管公事俸入多  
少事入得忠臣等商議其料錢雜給等錢望每貫割  
留二百文與攝官其職田祿未全還正官從之

會昌二年中書門下奏河東隴州鄜坊邠州等道比  
遠官加給課料河東等道或興王舊邦或陪京近地  
州縣之職人合樂為祗緣俸課寡薄官同皆遠伏準  
元和六年閏十二月十二日及元和七年十二月二  
十日勅河東鳳翔麟坊邠州易定等道令戶部加給  
課料錢共當六萬千二百五十貫文吏曹出得平流  
官數百員時議以為至當自後訪聞戶部听給零碎  
兼不及時觀察使以其虛折皆別將破用徒加有給  
不及官人近地好官依前比遠臣等商議伏望今日  
以後令戶部以實物仍及時支遣諸道並委觀察判  
官專判此案隨月加給官人不得別將破用如有違  
越觀察判官遠貶觀察使奏取進止選人官成後皆



于城中舉債到任頃還致之貪求罔不由此其今年  
河東隴西廊坊邠州新授比遠官等望許連狀相保  
戶部各借兩月加給料錢至任

唐會要卷九十三

宋

王

溥

撰

諸司諸色本錢上

武德元年十二月置公廨本錢以諸州令史主之號  
捉錢令史每司九人補於吏部所主纔五萬錢以下  
市肆販易月納息錢四千文歲滿授官  
貞觀元年京師及州縣皆有公廨田以供公私之費  
其後以用度不足京官有俸賜而已諸司置公廨本  
錢以番官貿易取息計員多少為月料  
十一年罷諸司公廨本錢以天下土戶七千人為胥



士視防閣制而收其課計官多少而給之

十二年復置公廨本錢諫議大夫褚遂良上疏言七十餘司更一二歲捉錢令史六百餘人受職太學高第諸州進士拔十取五猶有犯禁罹法者况塵肆之人苟得無恥不可使其居職太宗乃罷捉錢令史復給百官俸又令文武職事三品以上給親事帳內以六品七品子為親事以八品九品子為帳內歲納錢千五百謂之品子課錢凡捉錢品子無違負者滿二百日本屬以簿附朝集使上於考功兵部滿十歲量文武授官

十八年以京兆府岐同華邠坊州隙地陂澤可墾者復給京官職田

二十一年二月令在京諸司依舊置公廨本錢捉以令史府史胥士等令迴易納利以充官人俸至永徽元年廢之以天下租脚直為京官俸科其後又薄歛一歲稅以高戶主之月收息給俸尋顯以稅錢給之總十五萬二千七百二十緡  
光宅元年秘書少監崔沔請計戶均出每丁加升尺所增蓋少流亡漸復倉庫克實然後取於正賦罷新加者至開元十年中書舍人張嘉貞又陳其不便遂



罷天下公廨本錢復稅戶以給百官籍內外職田  
開元十八年御史大夫李朝隱奏請籍百姓一年稅  
錢充本依舊令高戶及典正等捉隨月收利將供官  
人料錢並取情願自捉不得令州縣牽捉  
其年復給京官職田州縣籍一歲稅錢為本以高下  
捉之月收贏以給外官復置天下公廨本錢收贏十  
之六天寶元年員外郎給料天下白直歲役丁十萬  
有詔罷之計數加稅以供用人皆以為目開元後置  
使其眾每使各給雜錢  
至德二年七月宣諭使侍御史鄭叔清奏承前諸使

下召納錢物多給空名告身雖假以官賞其忠義猶  
未盡才能今皆量文武才藝兼情願穩便據條格議  
同申奏聞

乾元元年勅長安萬年兩縣各備錢一萬貫每月收  
利以充和雇時祠祭及蕃夷賜宴別設皆長安萬年  
人吏主辦二縣置本錢配納質債戶收息以供費諸  
使捉錢者給牒免徭役有罪府縣不敢劾治民間有  
不取本錢立虛契子孫相承為之

寶應元年勅諸色本錢比來將收與人或府縣自取  
及貧人將捉非惟積利不納亦且兼本破除今請一



切不得與官人及百姓窮并貧典史揀擇當處殷富  
幹了者三五人均使翻轉迴易仍放其諸色差遣庶  
得永存官物又冀免破家

大歷六年三月初軍罷公廨本錢三千貫文放在人  
上取利充使以下食料紙筆宜於教內收一千貫文  
別納店舖課錢添公廨收利雜用

貞元元年四月禮部尚書李齊運奏書司本錢至少  
厨食闕絕請準秘書省大理寺例取部闕職官錢二

千貫文充本收利以助公厨司之  
其年九月八日勅自今後應懲息利本錢除主保逃

亡轉徵鄰近者放免餘並準舊徵息利本錢收其所  
欠錢仍任各取當司闕官職田量事糶貨充填本數  
并已後所舉不得過二十貫

十二年御史中丞王顏奏簡勘足數十王厨貫文二十

六王宅三百九十二貫門下省三千九百七十中書省

五千九百九集賢院四千四百六十崇元館五百宏

文館七百二十六太清宮貫文一千史館一千三百一尚

書都省一萬二千一百一十五貫吏部尚書銓三千二百

二十東銓二千四百四十五西銓二千四百三十三

南曹五百八甲庫二百六十八功狀院二百五考功







多年積成深弊宜委中書門下與所司商量其利害  
條件以聞不得擅有禁錢務令通濟

其年七月中書門下奏勅釐革京百司息利本錢應  
徵近親及重攤保并遠年逃亡等今年四月十七日  
勅本利并放訖其本事須借錢添填都計二萬五千  
九百四十三貫六百九十九文仗以百司本錢久無  
疏理年歲深遠亡失頗多食料既虧公務則廢事須  
添借令可支持伏望聖恩許令準數支給仍請以左  
藏庫度支除陌錢充勅旨宜依

諸司諸色本錢下

元和二年六月中書門下上言聖政維事新必歸本疏  
理坊五戶色役令府縣却收萬民欣喜恩出望外臣  
等敢不釐革書弊率先有司其兩省納課陪厨戶及  
捉錢人總一百二十四人望令歸府縣色役勅旨從  
之

其年五月御史中丞柳公綽奏諸請司諸使應有捉  
利錢戶其本司本使給戶人牒身稱準放免雜差遣  
夫役等如有過犯請牒送本司本使科責府縣不得  
擅有決罰仍求為常式者臣昨因奉進止追勘閑廐  
使下利錢戶割耳進狀劉嘉和訴說所由分外科配



等事山因勘責劉嘉和所執牒身所引勅文檢勅不  
牒閑廐使勘勅下年月日又稱遠年文案失落今據  
閑廐使利錢案一使之下已有利錢戶八百餘人訪  
聞諸使並同此例戶免夫役者通計數千家况犯罪  
之人又常僥倖所稱捉利錢戶先亦不得本錢百姓  
利其牒身情願虛立保契文牒一定子孫相承至如  
劉嘉和情願充利錢戶事由緣與人毆鬪打人頭破  
時便於閑廐使情願納利錢得牒身免府縣科決實  
亦不得本錢已具推問奏聞訖伏奉進止令臣具條  
流奏聞者今講諸司諸使所管官錢戶並依臺省舉

本納利人例諸司諸使更不得妄有準勅給牒身免  
差遣夫殺及有過犯許作縣處分如官典有違請必  
科處使及長官奏聽進止其先給牒者並仰本司本  
使收毀入後在人戶處收毀不盡其官典必有科責  
其捉錢戶原不得本錢者亦任使不納利廐得州府  
不失丁夫姦人免有僥倖勅旨宜依

九年十一月戶部奏準八月十五日勅諸司食利本  
出放已久散失頗多各委本司勘會其合徵錢數便  
充食錢若數少不充以除陌五文錢量其所欠添本  
出放者令准勅各牒諸司勘會得報據秘書省等三



十二司牒應管食利本錢物五萬三千九百五十二  
貫九百五十五文各隨司被逃亡散失見在徵數額與元置不同今但據元置數額而

己秘書省三千三百八十八文太常寺二千六百七十文光祿

寺一千二百九十九貫宗正寺九百五十七貫衛尉寺一千

寺六百二十四文太僕寺二千九百九貫大理寺五千九百二十四

文五百二十貫鴻臚寺二千六百六十六文司農寺二千七百七十五

府寺一千五百八十八文殿中省九百九十五貫詹事府一千

九十一貫三百國子監二千六百四十四貫少府監三百

春坊一千司天臺三百八十八貫家令司一千八百七十八

寺四百三十六貫總監二千六百七十左藏庫六百二十

尚食局三百三十尚舍局三百七十尚輦局一百太

倉二千四百十六貫內中局六百三十六萬年縣三千

貫六百長安縣二千七百四十五左衛五百四左司禦

帥府二百一十右司禦帥府一百勅宜委御史臺仔

細簡勘具合徵放錢數及量諸司閒劇人目加減條

流奏聞

其年十二月勅比緣諸司食利錢出舉歲深為弊頗

勘已有釐革別給食錢其御史臺奏所勘責秘書省

等三十二司食利本錢數內有重攤轉保稱甚困窮



者據所欠本利並放其本戶中納利如有十倍已止者既緣輸利歲久理亦司務准量前本利其並放其納經五倍已上從今年十二月以前應有欠利並放起元和十年正月已後準前計利徵收其餘人戶等計其倍数納利非多不可一例矜放宜並委本司準前後納其諸司所徵到錢自今以後仍放五分之一中常抽一分留添官本各勤本司以後相承收管其諸司應見徵納及續舉放所收利錢並準今年八月十五日勅充添脩司廨宇什物及令史官廚料等用仍委御史臺勾當每常至年終勘會處分其諸司除疏

理外見在錢據額更不得破用如有欠失即便勒主掌官典所由等據數填陪其中書門下兩省及尚書省御史應臺有食利錢外亦便令準此條流處分十年正月御史臺奏秘書省等三十二司除疏理外見在食利本錢應見徵納及續舉放所收利錢準勅並添充脩當司廨宇什物及令史臨使官廚料等用準元和九年十二月二十九日勅仍委御史臺勾當每至年終勘會處分及諸司疏理外見在本錢據額不得用如有欠失即便勒主掌官典所由等填陪者其諸司食利本錢疏理外舍徵收者請改案額為元



和十年新收置公廨本錢應緣添脩廨宇什物及令  
史府史等厨並用勒本司據見在戶名錢數各置案  
歷三官通押逐委造帳印記入案仍不得侵用本錢  
至年終勘會欠少本錢官典諸節級準法處分庶官  
錢免至散失年額既定勾當有憑勅旨宜依

十一年八月出勅京城百司諸軍諸使及諸道應差  
所由并名人投本錢右御史中丞崔從奏前件捉錢  
人等比緣皆以私錢添雜本官所防耗折裨補官利  
近日訪聞商販富人投身要司依託官本廣求私利  
可徵索者自充家產或逋欠者證是官錢非理逼迫

為弊非一今請許捉錢戶添放私本不得過官本錢  
勘責有剩並請沒官從之

其年九月東都御史臺奏當臺食利本錢從貞元十  
一年至元和十一年息利十倍以上者二十五戶從  
貞元十六年至元和十一年息利七倍以上者一百  
五十六戶從貞元二十年至元和十一年息利四倍  
以上者一百六十八戶伏見去年京畿諸司本錢並  
條流甄免其東都未蒙諒及者竊以准寇未平供饋  
尚切人力少疲衣食屢空及納息利年深正身既沒  
子孫又盡移徵親族旁支無支族散徵諸保人保人



逃死或所由代納縱倪旄狐獨仰無所依立限踰年  
虛繫錢數公食屢闕民戶不堪伏乞天恩同京諸司  
例特甄減裁下勅旨從奏十二年正月門下省奏應  
管食利錢總三千四百九十八貫三百二十一文宰相  
已下至主錄等食利三百七十八貫三百四十餘文  
直省院本錢準建中三年四月十五日勅以留院入  
錢置中書省奏富省食利本錢共五千貫文  
宰相以下官至  
本錄等食利錢一千貫直省院食利準元和九年十  
本錢準建中二年四月勅當院自置  
二月九日勅令勘會疏理其見在合徵錢準勅合充  
添脩當司廨宇什物其省院本錢緣是當院自斂置  
本請便充本添厨等用勅旨依奏

十四年十月御史中丞蕭冕奏應諸司諸軍諸使公  
廨諸色本利錢等伏緣臣當司及秘書省等三十二  
司利錢伏準本年七月十三日赦文至十倍者本利  
並放展轉攤保五至倍者本利並放緣前件諸司諸  
使諸軍利錢伏準本月年七月十三日赦節文並不  
談及其中有納利百姓見臣稱訴納利已至十倍者  
未蒙一例處分求臣上達天聽臣已面陳奏訖伏以  
南北諸司事體無異納利百姓皆陛下赤子若恩澤  
均及則雨露無偏伏望聖慈特賜放免勅旨從奏十  
五年二月詔內外百官食利錢十倍至五倍以上節



級放免仍每經十年即內外百司各賜錢一萬貫充  
本據司大小公事閒據及當司貧富作等第給付  
其年八月賜教坊錢五千貫充本以收息利

長慶元年三月勅添給諸司本錢準元和十五年五  
月十一日勅內外百司準二月五日赦文宜共賜錢  
一萬貫文以戶部錢充仍令御史臺據司額大小公  
事閒劇為等第均配

三年十一月賜內園本錢一萬貫軍器使三千貫  
其年十二月賜五坊使錢五千貫賜威遠鎮一千貫  
以為食利

太和元年十二月殿中省奏尚食局新舊本錢總九  
百八十員文狀以尚食貧虛更無羨餘添給伏乞聖  
慈更賜添本錢二十貫文許臣別條流方圓諸色改  
換收利支用庶得不失公事敕旨賜本錢一千貫文  
以戶部五文抽貫錢充

七年八月勅中書門下省所將本錢與諸色人給驅  
使官文牒於江淮諸道經紀每納利並無元額許置  
如聞納利殊少影射至多宜並勒停兩省先給文牒  
亦宜收訖聞奏以後不承正勅不在更置之限  
開成三年七月勅尚書省自長慶三年賜本錢後歲月



滋久散失頗多或息利數重經恩放免或民戶逋欠無處徵收如聞尚書丞郎官入省日每事闕供須議添助除舊賜本錢徵利收及吏部告身錢外宜每月共賜一百貫文委戶部逐月支付其本錢任準前收利添充給用仍委都省劄舊本及新添錢量多少均配逐行分析聞奏

四年六月上御紫宸殿宰臣李珣奏堂厨食利錢一千五百貫文供宰相香油蠟燭捉錢官三十人頗擾百姓今勘文書堂頭共有一千餘貫所收利亦無幾臣欲總收此錢用自不盡假令十年之後更無幾臣

此錢直令戶部供給亦得兩省亦有此錢臣亦欲商量共有三百餘人在外求利米鹽細碎非國體所宜上曰大細碎楊嗣復曰百司食利實為煩碎自貞觀以後留此弊法臣等即條流聞奏乃奏宰臣置厨捉錢官並勤停其錢並本錢追收勒堂後驅使官置庫收掌破用量入計費十年用盡後即據所須奏聽進止勅旨宜依

會昌元年正月勅節文每有過客衣冠皆求應接行李苟不供給必致怨尤刺史縣令但取虛名不惜百姓宜委本道觀察使條流量縣大小及道路要僻各



置本錢逐月收利或觀察使前任臺省官不乘館驛者計量事供給其錢便以留州留使錢充每至年終由觀察使如妄破官錢依前科配並同入已贓論仍委出使御史糾察以聞

其年四月河南府奏當府食本利錢出舉與人勅旨河南府所置本錢用有名額既無別賜所闕則多宜令改正名額依舊收利通用

其年六月河中晉絳慈隰等州觀察使孫簡奏準赦書節文量縣大小各置本錢逐月四分收利供給不乘驛前觀察使刺史前任臺省官管晉慈隰三州各

置本錢訖得絳州申稱無錢置本令使司使量貸錢二百貫充置本以當州合送使錢充勅旨宜依仍付所司是月戶部奏準正月九日勅文放免諸司食利錢每年別賜錢三萬貫文充諸司公用今準長慶三年十二月九日勅賜諸司食本錢共八萬四千五百貫文四分收利一年祇當四萬九百九十二貫文今請落下徵錢驅使官二百文課並更請於合給錢內四分中落一分均攤分配所得新賜錢均給東都臺省等一十四司雖落下一分錢緣置驅使官員於人戶上徵錢皆被延引雖有四分收利之名而無三



分得利之實今請每月合得利錢數外更添至三百  
貫文兵部吏部尚書等詮一十一司緣有舊本錢準  
勅放免又有公事今請每月共與一百五十貫文臣  
今於新賜外更請添賜上件錢所費不廣所利至多  
則內外諸司永得優足伏望聖恩允臣所奏勅旨宜  
依  
二年正月勅去年奏書所放食利祇是外百司食錢  
令戶兵共賜錢訖若先假以食利為先將充公用者  
並不在放免如聞內諸司息利錢皆以食利為名百  
姓因此亦求蠲免宜咨委所司不在放免之限

唐會要卷第九十四

推忠協謀佐理功臣光祿大夫守司空兼門  
下侍郎同中書門下平章事暨修國史上柱  
國太原郡開國公食邑二千戶實封四百戶  
臣王溥纂

北突厥 西突厥 沙陁突厥

吐谷渾

北突厥

高祖初起義兵晉陽劉文静曰與突厥相結資其士  
馬以益兵勢從之自為手啟遺始畢可汗云欲舉義



兵迎主上若能與我俱南願勿侵暴百姓若但和親  
坐受寶貨亦惟可汗所擇始畢得啟謂其臣曰隋主  
為人我所知也若迎以來必害唐公而擊我無疑苟  
唐公自為天子我當以兵馬助之即復書將佐皆請  
從突厥言帝不可裴寂乃請尊隋主為太上皇立代  
王為帝以安隋室旗幟雜用絳白以示突厥帝曰此  
掩耳盜鈴然逼于時事不得不然乃許之煬帝十三  
年六月遣使如北突厥突厥遣康鞘利等送馬千匹  
許發兵送帝入關帝受書命劉文静報突厥以請兵  
帝私謂文静曰胡騎入中國生民之大蠹我所以欲

得之者恐劉武周引之為患又胡馬行牧不費芻粟  
聊欲藉為聲援數百人之外無所用之八月帝克臨  
汾絳郡劉文静以突厥兵至遂下韓城帝即位之  
五月突厥遣使來時突厥強盛自契丹室韋西盡吐  
谷渾高昌諸國皆臣之又恃功驕倨每遣使至多暴  
橫帝亦優容之

武德元年八月遣鄭元疇以女妓賂始畢可汗始畢  
遣使來報帝宴之引升御座以寵之  
二年二月始畢死其弟處羅可汗立八月梁王師都  
與突厥合數千騎寇延州總管段德操擊破之十一



月師都請為鄉導謀大舉入寇是月處羅死其弟頡利可汗咄苾立三年五月立頡利恃其士馬雄盛有憑陵中國志又王世充說之曰昔啟民奔隋賴文帝力有此土宇子孫享之宜奉揚政道煬帝伐唐以報文帝之德頡利然之求請無厭言辭驕慢至是寇汾陽

四年三月頡利遣使送鄭元璿等還先是處羅與劉武周寇并州遣元璿諭以禍福不從未幾處羅死疑璿毒之留不遣又遣漢陽公環使頡利欲令環拜不屈亦留之復遣使賂頡利且許結婚遂遣使送還

六月寇定州八月寇并州遣鄭元璿詣頡利責以負約因說以得唐地不能居虜掠所得皆入國人於可汗何有不如還師修好坐受金幣孰與棄昆弟積年之歡結子孫無窮之怨頡利悅引兵還

七年閏七月秦王世民與虜遇於幽州頡利突利二可汗率萬騎奄至城西秦王帥騎馳詣虜陣告之曰國家與可汗和親何為負約深入我地我秦王也能鬪獨出與我鬪若以衆來我直以此百騎相當耳頡利不應又遣騎前告之爾往與我盟有急相救今乃相攻何無香火情頡利亦不應見秦王韓出又聞香



火之言疑突利與王有謀乃遣止之曰王不須渡我  
但欲申固盟約耳兵少却後雨久虜弓筋膠俱解秦  
王潛師夜進頡利大驚乃請和親  
九年秋七月頡利寇邊先是與突厥書用敵國禮帝  
欲改用詔勅突厥遂寇靈相潞沁韓朔等州張瑾全  
軍沒溫彥博為虜所執靈州都督任城王道宗擊破  
之請和而退

貞觀二年四月頡利以薛延陀回紇等叛遣突利討  
之敗還頡利拘而撻之突利怨表請入朝  
十一月突厥北邊多叛頡利歸薛延陀共推其俟斤

夷男為可汗夷男不敢當上方圖頡利乃遣使間道  
冊夷男為真珠毘伽可汗夷男建牙于太漠之鬱督  
年山下回紇拔野古阿跌同羅僕骨霄諸部皆屬遂  
遣弟入貢

三年十一月頡利因薛延陀之封大惧遂遣使稱臣  
請尚公主代州都督張公瑾上突厥可取六狀乃命  
李靖為行軍總管討之公瑾為副突厥俟斤九人及  
拔古僕骨同羅奚酋長並率眾來降復以李靖等分  
道出擊十二月突利入朝太宗喜曰朕治安中國四  
夷自服豈非上策乎



四年二月李靖襲破突厥于陰山頡利遁依沙鉢羅設蘇尼失部落王道宗引兵逼之使蘇尼失執頡利張寶相取之以獻蘇尼失舉衆降漠南遂空

十年正月突厥阿史那社爾降社爾處羅之子年十一以智畧聞處羅以為拓設建牙于磧北頡利亡西突厥亦亂社爾詐之襲取其地幾半衆十餘萬乃曰破我國者薛延陀也我當報仇擊滅之諸部皆諫不從大敗遂率衆降

十三年四月突利之弟結社率入朝為中郎將久不進秩陰結故部落四十餘人夜襲御營孫武開等帥

衆擊之盜馬北走追斬之七月自結社率之反群臣皆言留河南不便乃賜懷化郡王阿史那思摩姓李氏立為泥孰俟利苾可汗賜鼓纛使率其種落突厥咸憚薛延陀不肯出塞上賜延陀璽書言前破突厥止為頡利為百姓今冊還其故國爾薛延陀受冊在前突厥受冊在後當以先后為大小無故抄掠發兵問其罪薛延陀奉詔乃遣王孝恭等齎冊立之十八年十一月突厥俟利苾北渡河延陀惡之數相攻擊俟利苾有衆十萬不能撫御悉南渡河請處勝夏之間許之羣臣言陛下方遠征遼左而置突厥於



河南詎京師不遠豈得不為后患上曰夷狄亦人以  
德治之可使如一家且彼不北走延陀而歸我其情  
可見俟利苾既失衆輕騎入朝

二十一年冬十一月突厥車鼻遣使入貢車鼻本頡  
利同族頡利敗諸部欲立之薛延陀方強不敢當率  
衆歸之延陀因其有勇畧恐為後患欲殺之車鼻逃  
建牙金山之北餘衆稍歸之及延陀敗車鼻勢益張  
遣子入貢又請入朝遣使徵之率不至正月遣驍衛

郎將擊車鼻

車鼻本無罪帝因安市班師欲立奇功以雪恥耳

永徽元年九月遣高侃擊車鼻侃至阿息山車鼻發

諸部兵皆不應遂以百騎走侃追獲之送京師諸部  
盡內附置單于瀚海二都護府十都督二十二州分  
統之自是北邊無寇三十餘年

咸亨元年三月勅突厥酋長子弟給事東宮

調露元年十月單于大都護府突厥阿史德溫傳奉  
職二部俱反立阿史那泥熟荀為可汗一十四州酋  
長皆叛衆數十萬遣蕭嗣業等討之屢捷會大雪突  
厥襲其營為虜所敗

永隆元年三月以裴行儉為定襄道大總管將兵以  
討之大破於黑山擒奉職泥熟荀為其下所殺以首



來降

開耀七年阿史那伏念自立為可汗與阿史德溫傳道連兵為寇詔復以行儉為大總管曹懷舜副之引兵討伏念先遣裨將程務挺掩金牙襲獲伏念妻子輜重伏念北走又使務挺等追弭之伏念遂執溫傳以降餘黨悉平歸斬伏念溫傳於都市

永淳元年十月突厥餘黨阿史那骨篤祿阿史德元珍等招集亡散寇并州代州都督薛仁貴將兵擊之虜以仁貴流象州死仁貴免胄示之面虜失色下馬列拜引去仁貴因奮擊大破之

弘道元年二月突厥寇定州圍單于都護府五月寇蔚州

嗣聖三年九月以突厥斛瑟羅為繼往絕可汗四年七月骨篤祿寇朔州武后遣黑齒常之等擊之骨篤祿走磧北

六年九月武后以僧懷義討之十年九月骨篤祿死弟默啜立十一年三月復遣僧懷義討默啜十二年十月默啜遣使請降十四年三月默啜請為其女求昏武后遣嚴知微等冊為遷善可汗每虜降者處於豐勝靈夏朔代六州



至是默啜求之乃悉驅降戶歸之并許其昏由是默啜益強盛

十五年八月太后以武承嗣子延秀入突厥納其女默啜謂知微等曰我世受李氏恩欲以女嫁李氏安用武氏兒聞李氏惟兩兒在我將兵輔立之以知微為南面可汗發兵寇媯檀等州移書曰我可汗女當嫁天子兒武小姓罔加獻其書于朝上嘉之聽於西受降互市于是遣使入貢

二十二年十二月毗伽為其臣梅錄啜毒死子登利立

二十九年七月登利從叔二人分典兵馬號左右殺登利惡其端誘右殺斬之左殺判闕特勒攻殺登利骨咄葉護自立為可汗

天寶元載秋七月突厥拔悉蜜回紇葛邏祿三部共攻骨咄葉護殺之立拔悉蜜為頡跌可汗回紇葛邏祿自為左右葉護餘衆共立判闕特勒之子為烏蘓可汗朔方節度使王忠嗣說拔悉蜜等攻之烏蘓遁去突厥西葉護阿布思等帥餘衆千餘帳相次來降突厥由是遂微弱

三載八月拔悉蜜攻殺突厥烏蘇可汗國人立其弟



為白眉可汗于是勅忠嗣乘亂破其左廂十一部會  
回紇葛邏祿共攻拔悉蜜頡跌伊施殺之回紇骨力  
裴羅自立為骨咄祿毗伽闕可汗上冊拜裴羅為懷  
仁可汗  
四載正月懷仁為白眉所殺其子摩延啜立自號葛  
勒可汗

### 西突厥

西突厥曷娑那可汗入朝于隋留之國人立其叔父  
射匱可汗射匱者達頭之孫既立拓地東至金山西  
至海遂與北突厥為敵建庭于龜茲北三彌山射匱

卒弟統葉護可汗立勇而有謀北并鐵勒控弦十萬  
據烏孫故地又移庭于石國北千泉西域諸國皆臣  
之葉護各遣督其征賦

武德元年八月以西突厥曷娑那可汗為歸義王曷  
娑那獻大珠帝曰珠誠至寶然朕寶王赤心珠無所  
用之竟還冒為婚我為此起兵欲取河北耳九月陷  
趙州武后以帝為皇太子河北道元帥狄仁傑副之  
將兵討默啜默啜北遁追之不及

十六年十月默啜立其弟咄悉匄為右廂察骨篤祿  
子默矩為左廂察各主兵二萬餘其子匄俱為小可



汗位在兩察上主處木昆等十姓兵四萬餘又號為拓西可汗

十八年七月默啜寇益夏遂寇并州遣薛季昶等禦之

神龍二年十二月默啜寇鳴沙進寇原會等州掠隴右牧馬萬餘匹而去詔訪羣臣禦寇計策

景龍二年十一月突厥施烏質勒卒于娑葛自立為可汗故將闕啜忠節不服數相攻擊遣馮嘉賓持節安撫忠節呂守素處置四鎮以牛師獎為西安副都護發兵涼兵無徵吐蕃以討娑葛忠節逆嘉賓於討

舒河口娑葛遣兵襲之擒忠節殺嘉賓守素牛師獎與娑葛戰敗遂陷西安斷四鎮路遂赦娑葛立為可汗三年七月娑葛遣使請降

景雲二年正月默啜遣使請和遣和逢堯使突厥逢堯說默啜曰處密堅昆聞可汗結昏於唐皆歸當附何不襲唐冠帶使之聞之默啜許諾明日幘頭紫衫再拜稱臣

開元三年默啜既請和稱臣于是復圍北庭九月遣薛訥討之四年六月默啜為拔曳固斬首降來九年三月突厥昆伽遣使求和帝賜書以諭之果有







羅葉護立號南庭咄陸為北庭

十五年五月咄陸可汗殺沙鉢羅可汗

十六年咄陸既并沙鉢羅之衆自恃強盛遣兵寇伊州安西都護郭孝恪擊破之是年咄陸擊破米國不分虜獲與其下又斬其將泥熟啜泥熟啜部將胡祿屋襲擊之咄陸走保白水胡城所部詣闕請廢之上遣使立莫賀咄之子為乙毗射匱可汗率諸部擊咄陸咄陸敗之使人招其故部落皆曰使我一千人戰死一人獨存亦不汝從咄陸自知不為衆附乃奔吐火羅

十九年六月乙毗射匱可汗遣使入貢且請昏許之使割龜茲于闐疎勒朱俱波葱嶺五國以為聘禮

二十二年四月葉護賀魯來降咄陸既奔吐火羅部落亡散其葉護阿史那賀魯帥其餘衆數千帳內屬詔以為瑶池都督

永徽三年七月賀魯招集離散廬帳漸盛聞太宗崩遂叛擊破射匱滅之勝兵數十萬與乙毗咄陸連兵處月處密及西域諸國多附之進寇庭州攻陷金嶺城詔梁建方契苾何力發兵及回紇以討之

四年十二月乙毗咄陸死子頡苾達度設號真珠葉



護與沙鉢羅有隙尋為沙鉢羅所併

六年五月屯衛大將軍程知節將兵討沙鉢羅不克  
顯慶二年正月遣蘇定方等復擊沙鉢羅定方至曳  
咥河西沙鉢羅帥兵十萬拒戰擊敗之會大雪平地  
二尺定方曰虜恃雪深謂我不能進亟追之可及也  
又斬獲數萬沙鉢羅脫走趨石國諸部各歸所居乃  
命蕭嗣業追獲之遂分其地置崑陵濛池二郡都護  
府以彌射為興昔亡可汗押五咄陸部落步真為總  
往絕可汗押五弩失畢部落  
龍朔二年十月勅興昔亡繼往絕二可汗發兵與蘇

海政討龜茲繼往絕素與興昔亡有怨密請海政矯  
勅收斬之其部落亡走海政追討平之繼往絕尋死  
十姓無主附於吐蕃

三年十月西突厥寇庭州刺史來濟將兵拒之不能  
禦遂赴敵死

永淳元年四月阿史那車簿圍弓月安西都護王方  
翼救之三姓咽麵與車簿合兵拒方翼戰於熱海分  
遣裨將襲破之擒其酋長三百人西突厥遂平

嗣聖七年十月西突厥十姓自垂拱以來為東突厥  
所侵掠散亡畧盡繼往絕可汗斛瑟羅收其餘衆入



居內地武后以為竭忠事主可汗

二十一年正月周以阿史那懷道為西突厥十姓可

汗

西突厥

貞觀十二年九月上以薛延陀強盛恐後難制分封  
其二子皆為小可汗各賜鼓纛外示優崇寔分其勢  
十五年十一月薛延陀真珠可汗聞將東封境內必  
虛我此時取思摩奴如拉朽乃命其子大度設法諸  
部兵合二十萬擊突厥思摩不能禦率部落入長城  
保朔州遣使告急詔遣李世勣等分道擊之十二月

世勣敗薛延陀于諾真水捕獲五萬餘大度說脫走  
十六年十月上謂侍臣曰薛延陀屈強今禦之有二  
策苟非發兵殄滅之則與之婚姻以撫之房玄齡曰  
兵凶戰危臣以為和親便即命兵部侍郎崔敦禮持  
節使薛延陀許以新興公主妻之

十七年真珠使其姪來納聘獻羊馬契苾何力上言  
薛延陀不可與昏上曰我許之矣可食言乎何力曰  
願且遷延勃夷男使親迎彼必不敢來則絕之矣上  
乃召真珠可汗會禮真珠欲行其臣不可往必不返  
真珠謂天子聖明遠近朝服今親幸靈州以愛主妻



我我得見天子死亦不恨薛延陀何患無君因多以  
羊馬為聘禮經沙磧耗死過半乃責以聘禮不備絕  
之褚遂良上疏曰往者夷夏咸言陛下欲安百姓不  
愛一女莫不懷德今忽有改悔之心得少失多竊為  
國家惜之嫌隙既生必構邊患彼國蓄見欺之怒此  
民懷負約之慚恐非所以服遠人訓戎士也不聽薛  
延陀本無府庫至是厚歛諸部以充聘財諸部怨叛  
延陀由是衰弱  
十九年九月真珠二子長曰曳莽次曰拔灼初分立  
為小可汗至是真珠死拔灼殺其兄曳莽而自立是

為多彌可汗十二月薛延陀寇夏州

二十年正月夏州兵擊薛延陀大破之  
二十一年八月多彌猜禰好殺廢父時貴臣專用已  
所親昵國人不附回紇諸部落擊之大敗上詔王道  
宗等將兵擊之國中驚擾多彌出走回紇殺之盡據  
其地餘眾西走猶七萬共立真珠兄子吐摩支遣使  
奉表請居鬱督軍山之北詔遣使安集之勅勃九姓  
酋長聞其來皆懼朝議亦恐其為磧北之患乃遣李  
世勣圖之上自幸靈州招撫之世勣至鬱督軍山吐  
摩支降道宗兵既渡磧薛延陀拒戰道宗擊破之遣



使招諭勅勒諸部其酋長皆喜請入朝駕至浮陽回  
紇等十一姓各遣使歸命乞置官司上喜遣使納之  
詔曰朕聊命偏師遂擒頡利始弘廟畧已滅延陀鐵  
勒百餘萬戶請為州郡混元以降書未前聞宜備禮  
告廟仍頒示普天上又為詩曰雪恥酬百姓除凶報  
千古勒石於靈州

### 吐谷渾

初隋煬帝征吐谷渾可汗伏允奔黨項煬帝立其質  
子順為主不果入會中國喪亂伏允還收其故地仍  
自稱吐谷渾可汗

武德二年二月涼李軌奉書于帝稱從弟大涼皇帝  
臣軌帝怒議討之遣使與伏允連和使引兵擊李軌  
許以順還之伏允喜起兵擊軌數遣使入貢請其質  
子順帝遣還之

四年七月吐谷渾寇洮岷二州遣岐州刺史柴紹救  
之為其所圍虜乘高射之矢下如雨紹遣人彈胡琵琶  
二女子對舞虜怪之相與聚觀紹察其無備潛遣精  
騎出虜陣後擊之衆大潰

八年正月吐谷渾突厥各請互市詔皆許之先是中  
國喪亂民乏耕牛至是資於戎狄雜畜被野



貞觀八年十月吐谷渾可汗伏允老耄其臣天柱王  
用事數入塞侵盜詔大舉兵討之上欲以李膺<sup>靖</sup>為將  
因其老不欲重勞之靖聞之請行上大悅以靖為西  
海道行軍大總管節度諸軍討之

九年五月李靖悉燒野草輕兵走入磧諸將以為馬  
無草未可深入侯君集曰虜一敗之後鼠逃鳥散取  
之易于拾芥此而不乘後必悔之靖從之分軍為兩  
道敗吐谷渾於牛心堆又敗諸赤水源君集追伏  
允于烏海與戰大破之靖襲破伏允牙帳伏允子順  
斬天柱王來降伏允為左右所殺國人立順為可汗

詔以為西平王後順為國人所殺上遣侯君集將兵  
立其子諾曷鉢為可汗

十年三月吐谷渾請頒曆遣子入侍

永徽三年正月吐谷渾遣使入貢

咸亨三年二月徙吐谷渾于靈州其故地皆入於吐  
蕃

乾寧元年六月李克用大破吐谷渾



卷之六

傳聞於世其日幸子與大狐山合戰

其年三月二十四日始於谷軍十軍隨其始與皆入武出

本國之軍五日始於谷軍隨其始與皆入武出

其年三月二十四日始於谷軍十軍隨其始與皆入武出

其年三月二十四日始於谷軍十軍隨其始與皆入武出

其年三月二十四日始於谷軍十軍隨其始與皆入武出





